

CARTA XIHNA ÑUHUN JA NI NTEE SAN PABLO

APOSTOL NUU NDA NCHIVI ÑUU CORINTO

1 ¹Maá nī cúu Pablo, de nī ncana Yāa Dios nduhū jā cúu nī apóstol Jesucristo. Chi súcuán nī jētahān inī yā nī ntají yā nduhū jā nacani nī tūhun yā. De ndúū nī jín hermano ō Sóstenes
²tée nī carta yáhá cuēē nūū ndá ndóhó nchivī ñuū Corinto jā cándíja nú Yāa Dios. Chi cúu ndá nú nchivī maá yā, chi yíhí nú ndahá Cristo Jesús. Chi nī ncana Yāa Dios ndá nú jā coo ndoo coo iī nū nūū yā. De nī ncana yā ndá nú jondē jín ndá cā nchivī jā nácunehen ji maá Jētohō ō Jesucristo, ní- nī cúu nūū íyó ndá ji. Chi Jētohō ndācá ó jín ndá ji cúu yā.
³De ñúhún inī nī jā Tatá ó Yāa Dios jín Jētohō ō Jesucristo ná sáhá cā yā jā váha ndá nú, de sáhá yā jā coo ndeé coo siī inī nū.

Cristo cúu jā sáhá ndācá jā váha yóhó

⁴De níní nácuetáhví nī nūū Yāa Dios jā síquī ndá nú, chi jā jín Cristo Jesús nī nsáhá yā jā váha ndá nú.
⁵Chi yíhí nú ndahá Cristo, de jā núcuán nī nsáhá Yāa Dios jā íyó cuícá ndá nú jín ndācá tūhun yā, chi jícūhun vāha inī nū, de cúu nácani nú.
⁶Chi súcuán cúu jā íní nīhin ndá nú jín tūhun Cristo jā ní nacani ndá nī nūū nū.
⁷De súcuán de nduú cúmanī nī iin tāhví jā jéhe yā jā cuu ánō ndá nú juni ndétu nú quiví jā nenda nijín Jētohō ō Jesucristo.
⁸De maá yā chi sáhá yā jā cuiñi nīhin ndá nú jondē jīnu quiví, tácuā mā cōó cuāchi síquī nū quiví jā nenda Jētohō ō Jesucristo.
⁹Chi squíncuu Yāa Dios ndācá jā ní nquee yuhú yā, de nī ncana yā ndá nú tácuā cunī táhán nú jín Sēhe yā, Yāa cúu Jētohō ō Jesucristo.

Síquī jā má cōó síin inī ji jín táhán ji

¹⁰Hermano, jondē jín síví Jētohō ō Jesucristo cáhān ndāhví nī jín ndá nú jā inuú-nī natúhún ndá nú jín táhán nú, de mā cōó síin inī nū, chi sa vāha inuú coo inī ndá nú jín ndācá jā jāni inī nū.
¹¹Súcuán cáhān nī, ñanī mánī, chi nī ncachī tūhun ndá nchivī vehe Cloé nūū nī jā tétáhán ndá nú.

¹²Chi tá iin iin nú síin síin cáhān nū: Nduhū chi jíin Pablo íní nī, cáhān sava nú. De sava cā nū: Nduhū chi jíin Apolos. Nduhū chi jíin Pedro. Nduhū chi jíin Cristo. Cáhān ndá nú.

¹³De jā cáhān ndá nú súcuan, ¿de á jáni inī nū jā síin síin Cristo cúu jā nácani ndá nī tūhun? ¿De á nduhū jā cúu Pablo nī jīhī yīcā cruz jā jéhē ndá nú? ¿De á jíin sívī nduhū nī jenduté ndá nú?

¹⁴Nduú cuitī. De cútahvī ni nūū Yāā Dios jāá nduú cuāhā ndá nú ní scuénduté nī, chi vāchi Crispo jíin Gayo-nī,

¹⁵tácua mā cáhān ni iin nú jā jíin sívī nī nī jenduté nú.

¹⁶De cáta núcūhun inī ni jā suni nī scuénduté nī Estéfanos jíin nchivī vehe dē. De sanaā de súcuan-nī cúu nchivī jā ní scuénduté nī, jáni inī nī.

¹⁷Chi nduú ní ntétínú Cristo nduhū jā scuénduté nī, chi sa jā nacani nī tūhun jā scácu yā nchivī. De nduú ní ndúcú nī jā stéhēn ni nūū nū iin modo ndíchí jā má jícūhun inī nū, chi tú súcuan de mā cúu jícūhun vāha inī nū tūhun jā ní jīhī Cristo yīcā cruz nícu.

Jíin Cristo nī stéhēn Yāā Dios poder yā jíin tūhun ndíchí yā

¹⁸De tūhun jā ní jīhī yā yīcā cruz jā scácu yā nchivī, chi tūhun naā cuitī cúu nūū ndá nchivī jā cuáhān nūū tātū tāhvī. Sochi ndá máá ó jā cuáhān ō nūū cācu ó, chi jīnī ō jā tūhun Yāā Dios jā ndíso poder cúu.

¹⁹Chi súcuan yósō nūū tutū īī jā ní ncāhān Yāā Dios:

Ná snāā ni tūhun ndíchí jā cáhān nchivī ndíchí cuenta ñayiví yáhá, de mā cuétáhvī nī tūhun cáhān ndá nchivī jā jáni inī jā jīnī vāha.

Ncachī yā.

²⁰¿Túsaá de ní cuetínú ndá tēe ndíchí cuenta ñayiví yáhá, jíin ndá tēe stéhēn tutū, jíin ndá tēe jā nánducú vāha sīquī ndá jā stéhēn nchivī ñayiví? Chi ndācá tūhun ndíchí cuenta ñayiví yáhá, nī ncāhān Yāā Dios jā tūhun naā cuitī cúu.

²¹Chi ndíchí ndasí sáhá Yāā Dios. Chi ndá tūhun ndíchí jā jīnī nchivī ñayiví, nī ncachī yā jāá nduú jétínú jā cunī ji nāsa Yāā cúu yā. Núcuan de nī jētahān inī yā jā jíin tūhun yā jā nácani ndá nī de scácu yā nchivī cándíja, vísō jáni inī nchivī ñayiví jā tūhun naā cuitī cúu.

²²Chi nchivī hebreo, maá-ni jā cúnī ji jā sáhá Yāā Dios cuāhā tiñu ñáhnú jā stéhēn poder yā. De nchivī griego chi maá-ni sīquī tūhun ndíchí cúu jā ndíhvī inī ji.

²³Sochi ndá máá nī chi sa nácani nī tūhun jā ní jīhī Cristo yīcā cruz jā scácu yā nchivī. De tūhun yáhá sáhá jā cúyichī inī nchivī hebreo, de nchivī ndá cā nación chi jáni inī ji jā tūhun naā cuitī cúu.

²⁴Sochi ndá nchivī jā ní ncana yā jā ní nquīvi ndahá yā, vísō nchivī hebreo á nchivī griego, chi jínī ji jā jín Cristo nī stéhēn Yāā Dios poder yā jín tūhun ndíchí yā.

²⁵Chi tūhun Yāā Dios jā cáhān nchivī jā tūhun naā cuitī cúu, ndíchí ndasí cā nsūú cā tūhun ndíchí nchivī. De jání inī nchivī jāá nduú nā poder yā tá nī jihī Jesús jā scácu yā yóhó, de nduú chi téyíí ndasí cā poder yā ñúcuán nsūú cā poder nchivī.

²⁶Hermano, ndá máá nú cúu jā ní ncana yā nī nquīvi nú ndahá yā. De cundēhé ndá nú jāá nduú íyó cuāhā nū jā ndíchí jín tūhun ñayiví, de ni nduú íyó cuāhā nū jā tátúnī, de ni nduú íyó cuāhā nū jā cúu sēhe nchivī cúñáhnú.

²⁷Chi sa nī nacāji Yāā Dios ndācá jā cáhān nchivī ñayiví jāá nduú ndíchí cuitī, tácu coo tūhun canoō nū ndācá jā ndíchí. De nī nacāji yā nchivī jāá nduú téyíí inī ñayiví, tácu coo tūhun canoō nū nchivī téyíí.

²⁸De suni nī nacāji yā ndācá jāá nduú cúñáhnú inī ñayiví, jín ndācá jā sáhá jéhe inī ji nū, jondē jín ndācá jā jání inī ji jāá nduú tiñu, tácu snúu yā ndācá jā cúñáhnú inī ñayiví.

²⁹Súcuán nī nsāhá yā tácu ni iin nchivī mā cūú sáhá téyíí ji maá ji nū yā.

³⁰Sochi ndá máá nú chi nī nsāhá Yāā Dios jā inuú-ni cúu nú jín Cristo Jesús. Chi jondē nū maá yā nī nīhīn ō tūhun ndíchí, de nī sndáhvā yā cuāchi ó, de nī nsāhá yā jā íyó ndoo íyó ī ō nū yā, chi nī scácu yā yóhó.

³¹Túsaá de ná cóo tá cúu nū cáhān tutū: Tú iin nchivī cúnī ji cutéyíí ji, de ná cutéyíí ji sīquī jā ní nsāhá maá Jētohō ō jēhē ji, cáchī.

Jā nácani Pablo tūhun jā ní jihī Cristo

2¹De nduhū, hermano, tá nī jēē ni nū ndá nú jā nacani nī tūhun ndāā Yāā Dios, de nduú ní nácani nī tūhun ndíchí jā má jícūhun inī nū.

²Chi tá nī iyo nī jín nú de nduú nā incā tūhun ní ndúcú nī jā cachī tūhun nī nū nū, chi maá-ni tūhun Jesucristo jā ní jihī yā yīcā cruz jā scácu yā yóhó.

³De tá nī jēē ni nū ndá nú, chi nduú nā fuerza ni, de yúhú nī, de quísi nī.

⁴De tá nī nacani nī tūhun nū ndá nú, chi nsūú jín tūhun ndíchí nchivī ñayiví ní scándíja nī ndá nú, chi sa jín poder maá Espíritu Yāā Dios nī stéhēn ni nū nū,

⁵tácu mā cuiñí nú sīquī tūhun ndíchí jā cáhān nchivī, chi sa cuiñi nú sīquī poder Yāā Dios.

Jín Espíritu de stéhēn Yāā Dios nāsa Yāā cúu yā

⁶De ndāā chi ndíchí cáhān ndá nī jín ndá nchivī ja nī jija jín tūhun jā cándíja ji yā. Sochi nsūú tūhun ndíchí jā íyó inī ñayiví yáhá, de ni nsūú

tūhun ndíchí jā cáhān ndá tēe cúñáhnú ñayiví yáhá, chi ndá tēe ñúcuán chi yáha-ni jā cúñáhnú dē.

⁷Chi tūhun jā cáhān ndá nī cúu tūhun ndíchí maá Yāa Dios jā ní nchiyuhū. Chi tūhun ndíchí ñúcuán jā ní iyo yuhū, chi nī jaquīn Yāa Dios jondē ncháha ca jēcōo ñayiví, tácuca cācu ó jā cutecū ō níí cání sáhá tūhun ñúcuán.

⁸Chi nī iin tēe jā cúñáhnú inī ñayiví yáhá, nduú ní jícūhun inī dē tūhun ndíchí ñúcuán. Chi tú ní jícūhun inī dē nícu, de mā cáhnī cuitī dē maá Jētohō ō, Yāa jā vii cúñáhnú.

⁹Chi cúu tá cúu nūu cáhān tutū iī:

Ndācá jā ní nsáhá tūha Yāa Dios jā cuu nchivī jā mānī jín yā, ni iin ñúcuán nduú ní jínī jínúu nchivī, de ni nduú ní jínī jín sóho ji, de ni nduú ní nquíji jā súcuán cani inī ji.

Cáchī tutū.

¹⁰Sochi ndá máá ó chi nī stéhēn Yāa Dios ndá ñúcuán nūu ō jín Espíritu Santo yā. Chi maá Espíritu jínī vāha yā de stéhēn yā ndihi, chi jondē ndācá tūhun ndíchí cā maá Yāa Dios.

¹¹Chi nī iin nchivī mā cūu cunī ji nāsa jáni inī incā nchivī, chi maá ji-ni jín ánō ji cúu jā jínī. De suni súcuán ni iin nchivī nduú jínī ji nāsa jáni inī Yāa Dios, chi maá-ni Espíritu Yāa Dios cúu jā jínī.

¹²De maá ó chi nī nihīn ō Espíritu ñúcuán jā vāji nūu Yāa Dios, de nduú jáni inī ō tá jáni inī nchivī ñayiví. De jā ñúcuán cúu jā jícūhun inī ō nāsa nī nsáhá Yāa Dios jā váha yóhó sīquī jā vāha inī yā.

¹³De suu sīquī ndācá yáhá cúu jā cáhān ndá nī, de nsūú jín tūhun jā stéhēn nchivī ndíchí, chi sa jín tūhun jā stéhēn maá Espíritu. Chi stéhēn ndá nī tūhun Espíritu nūu ndá nchivī jā névāha Espíritu.

¹⁴Sochi nchivī jāá nduú névāha Espíritu Yāa Dios, nduú jétáhvī ji ndá tūhun jā vāji nūu Espíritu, chi jáni inī ji jā tūhun naā cuitī cúu. De mā cūu jícūhun inī ji, chi nduú névāha ji maá Espíritu jā sáhá jā jícūhun inī ji.

¹⁵De nchivī jā névāha Espíritu, chi jícūhun inī ji nāsa íyó ndihi-ni. De nchivī ñayiví mā cūu jícūhun inī ji nāsa nchivī cúu nchivī ñúcuán.

¹⁶Chi cáhān tutū iī: ¿Ní iin cuu cunī nāsa jáni inī maá Jētohō ō? ¿De ní iin cuu stéhēn nūu yā? Ni iin mā cūu. Cáchī tutū. De vísō súcuán de maá ó chi jáni inī ō tá cúu nūu jáni inī Cristo.

Jā chíndeé táhán ndá dē jā sáhá dē tiñu Yāa Dios

3 ¹De nduhū, hermano, nduú ní ncúu cáhān ni jín ndá nú tá cúu nūu cáhān ni jín nchivī jā jíca jín Espíritu. Chi sa nī ncāhān ni tá cúu nūu cáhān ni jín nchivī jā cáta jíca jín modo maá. Chi cúu ndá nú tá cúu sūchí lúli jāá ncháha ca cuja nú jín tūhun Cristo.

²Nī stéhēn ni jāá nduú víjín nūū ndá nú, chi cúu nú tá cúu sūchí lúli jā cáta jáxín cā. De nduú ní ncáhān ni jín nū tūhun víjín jā cúu tá cúu jā cājí jā yájí nchivī ja nī jija, chi ncháha ca quenda nú jín jondē saá. De mitan suni ncháha ca quenda nú jín.

³Chi cáta jica cā ndá nú jín modo nēhén maá nú. Chi cúcuásún inī ndá nú, de cánāá nú, de cúsíin inī nū. Túsaá de cúu ndá nú tá cúu nchivī ñayiví jā jica jín modo nēhén maá.

⁴Chi iin nú cáhān: Nduhū chi jín Pablo íñi nī. De incā nū cáhān: Nduhū chi jín Apolos. De súcuán cúu jā jica ndá nú jín modo nēhén maá nú.

⁵¿De ní iin cúu nduhū, de ní iin cúu Apolos túsaá? Vāchi mozo-ni cúu ndúū ni nūū Yāā Dios, de nī jetínú yā nduhū tácuca candíja ndá nú maá Jētohō ō. Chi tá iin iin nī nī nsāhá tiñu nāsa nī jēhe maá Jētohō ō nūū ni.

⁶Nduhū chi modo jā ní jaquín ni tūhun yā inī ánō nū, de Apolos chi modo jā ní nchuhun dē ndute, cúu jā ní stéhēn cā dē nūū ndá nú. Sochi maá Yāā Dios cúu jā ní scuáhnu tūhun inī ánō nū.

⁷Túsaá de nduú ná cúu sáhá tēe jā jáquín, de saá-ni tēe jā chúhun ndute, chi sa maá Yāā Dios cúu jā scuáhnu.

⁸De tēe jáquín jín tēe chúhun ndute, iin-ni cúu dē. De ndācá dē chi cuāha yā yāhvi dē nāsa tiñu nī nsāhá iin iin dē.

⁹Chi ndá nduhū chi cúu nī tēe chindeé táhán jā sáhá nī tiñu Yāā Dios. De ndá ndóhó cúu tá cúu itū maá Yāā Dios jā sátínú yā jín. De suni tá cúu iin vehe jā sáhá Yāā Dios cúu ndá nú.

¹⁰De nduhū chi cúu nī tá cúu iin maestro albañil jā ní ntavā ni cimientto vehe ñúcuán, cúu jā ní scándíja nī ndá nú. De incā dē sāmā dē sīquī, cúu jā stéhēn cā dē nūū nū. Túsaá de tá iin iin dē ná cóo cuidado dē nāsa sāmā dē sīquī.

¹¹De Jesucristo cúu cimientto vehe ñúcuán, de nī iin mā cūú tavā incā cimientto, chi maá yā cúu jā ní sndáhvā cuāchi ó.

¹²De ndācá nchivī cándíja, chi sáhá ji vehe sīquī cimientto ñúcuán, de á jín ndatínú váha tá cúu oro á plata á yūū luu, á jín jā ñamā naā, tá cúu ñutun á itē á ndáyóho.

¹³De natūu tiñu jā ní nsāhá iin iin ji, tú nāsa nī ndihvī inī ji sīquī maá yā. Chi maá quivī juicio jā sáhá ndāā yā tiñu nchivī, suu quivī ñúcuán natūu cājí tiñu ji. Chi jín ñuhūn quiqi quivī ñúcuán, de modo tá sáhá ñuhūn jā téñuhūn ndācá jā cúu cáyū, suni súcuán coto túnī yā tiñu iin iin ji.

¹⁴De tú nduú ní ncáyū tiñu jā ní nsāhá ji sīquī cimientto, de nīhīn ji tāhvī ji.

¹⁵Sochi tú nduú ní ndíhvī inī ji jín tiñu yā, de mā nīhīn ji tāhvī ji, chi modo jā cáyū tiñu ji. Sochi maá ji chi cācu ánō ji, vísō modo ja ñatin cáyū ji nūū yáñuhūn.

¹⁶¿A nduú jínī ndá nú jā cúu nú tá cúu templo Yāā Dios, chi ndéē Espíritu Yāā Dios inī ánō nū?

¹⁷De tú iin nchivī stívī ji templo Yāā Dios, de stánū tāhvī yā nchivī ñúcuán. Chi ndoo ndasí íyó templo yā, de suu cúu ndá máá nú.

¹⁸Ni iin nú mā stáhvī nú maá nú jín jā jāni inī nū. Tú iin nchivī jāni inī ji jā ndíchí ji jín ndá tūhun ñayiví yáhá, de vāha cā ná siáā ji, tácu coo ndíchí ndija ji jín tūhun maá yā.

¹⁹Chi tūhun ndíchí jā íyó inī ñayiví yáhá, tūhun naā cuitī cúu nū Yāā Dios. Chi cáhān nū tutū īī: Nchivī ndíchí cuenta ñayiví chi nátiin yā ji sīquī ndācā tūhun ndíchí ji jā jāsi ji nū tūhun yā, cáchī.

²⁰De cáhān tucu tutū: Maá Jētohō ō jínī yā ndācā jā jāni inī nchivī ndíchí, chi maá-ni jā jāni cāhá inī ji, cáchī.

²¹Túsaá de ni iin nú mā cútéyíí nú jā sīquī ni iin tē ndíchí. Chi cuenta ndá máá nú cúu ndihi-ni.

²²Cúu Pablo, cúu Apolos, cúu Pedro jā stéhēn ndá dē nū nū. Cúu ndihi jā íyó inī ñayiví, jā íyó mitan jín jā coo. De vísō tú cutecū nū á cuū nū, de ndihi-ni cúu cuenta ndá nú.

²³De ndá máá nú cúu cuenta Cristo, de Cristo cúu cuenta Yāā Dios.

Jā sātínú ndá apóstol sīquī tūhun yā

4 ¹Túsaá de canī inī ndá nú jā mozo-ni cúu ndá nī nū Cristo, jā ní ntetínú yā nduhū jā stéhēn ni tūhun Yāā Dios jā ní nchiyuhū jondē janahán.

²De ndāā chi tē jā sātínú sīquī ñúcuán, íyó responsable tá iin iin dē jā squíncuu vāha dē.

³De nduhū chi nduú sáhá nī cuenta tú nánducú ndá nú sīquī ni nāsa sáhá nī, á tú nánducú nchivī jā cúñáhnú inī ñayiví. De juni maá nī chi nduú nánducú nī sīquī maá nī.

⁴Chi vísō jínī ni jín ánō ni jāá nduú nā cuāchi nī, sochi nsūú ñúcuán cúu jā quéndō ndāā nī, chi maá Jētohō ō cúu jā jito túnī nduhū.

⁵Túsaá de mā nánducú ndá nú sīquī tiñu táhán nú, chi tá quenda maá quivī sá de cunī nū. Chi jondē tá ndiji maá Jētohō ō, de nastúu nijin yā ndācā tiñu jā yíyuhū nū neē, de stéhēn nijin yā ndācā jā jāni inī nchivī jín ánō ji. Ñúcuán de maá Yāā Dios cuetúhún yā tá iin iin ji nāsa nī nsāhá ji.

⁶Hermano, ndācā tūhun yáhá nī ncāhān ni tácu quendō vāha ndá nú. De nī ncachī ni jā maá nī jín Apolos, chi mozo-ni cúu ndúū ni nū yā, de súcuán cúu nī iin ejemplo nū ndá nú. De cáhān ni jā súcuán cúu nī, tácu cutūha nú canī inī nū maá-ni tá cúu nū cáhān tutū īī. Chi mā sáhá vixī nū jā cuetúhún nú iin tē jā stéhēn, de incā dē nduú.

⁷¿De nūcu cútéyíí ndá nú nū táhán nú túsaá? ¿De nā cuá íyó nū ndá nú jāá nduú ní ncútahvī nū nū yā? De tú jā ní ncutahvī nū cúu, ¿de nūcu sátéyíí ndá nú maá nú jā modo jāá nsūú jā ní ncutahvī nū cúu?

⁸Va ja nī ncucuícá ndá nú, de ja névāha nú ndihi, jáni inī nū túsaá. De ja tátúnī ndá máá nú, de ni nduú cā jīni ñúhún nú nduhū, jáni inī nū. Nduú vāha jā súcuán cútéyíí ndá nú. De nācā vāha de tú jā tátúnī ndija ndá nú nícu, tácuva va suni cuāha nú tūhun jā tátúnī ndá nī jín nū túsaá.

⁹De íyó tá jáni inī ni jā ndá nduhū jā cúu apóstol, chi nī nsāhá Yāā Dios jā cúu ndá nī modo tēe núu cā nūū nchivī, modo tēe jā ní ncundaā jā cuū dē. Chi níí ñayiví jín andiví ndéhe vāha nūū ni, cúu ndá ángel jín nchivī.

¹⁰Chi jā síquī Cristo de cáhān ndá ji jā tēe naā cúu ndá nī. De ndá ndóhó chi va ndíchí nú jín tūhun Cristo, jáni inī nū. De ndá nduhū chi nduú nā fuerza ni, de ndá ndóhó va íyó fuerza nū, jáni inī nū túsaá. De ndá ndóhó chi íyó yíñúhún nchivī nūū nū, sochi nūū ndá nduhū chi sáhá jéhe inī ji.

¹¹Níí cání jā váji ndá nī de jīhī ni sōco jondē mitan. De yíchī ndá nī ndute, de cúmanī sahma nī, de nduú sáhá vāha nchivī jín nī, de ni nduú nā vehe névāha ndá nī.

¹²De nīhin sátínú ndá nī jín ndahá nī. De cáhān nāvāha ji nūū ndá nī, sochi cáhān vāha nī jín ndá ji. De jínī ūhvī ji ndá nī, sochi jéndeé inī ni.

¹³De cáhān nēhén ji síquī ndá nī, sochi cáhān mānī ni jín ji. De cúu ndá nī tá cúu yācá inī ñayiví, de squéne yichī ji nduhū jondē mitan.

¹⁴De nsūú jā tēe nī yáhá jā cucanoō nū, chi sa jā sndíhvī inī ni ndá nú, chi cúu ndá nú modo sēhe nī jā mānī ni jín.

¹⁵Chi vísō ná cóo ūxī mil tēe jā stéhēn tūhun Cristo nūū nū, sochi iin-ni tatá nú íyó. De nduhū cúu modo tatá ndá nú, chi nī scándíja nī ndá nú jā ní nacani nī tūhun vāha Cristo Jesús jā scácu yā yóhó.

¹⁶Túsaá de cáhān ndāhvī nī jín nú jā ndacu ndá nú nduhū.

¹⁷De jā ñúcuán cúu jā ní ntají nī Timoteo cuēē dē nūū ndá nú. Chi cúu dē modo sēhe nī jā mānī ni jín dē, de squíncuu vāha dē nūū maá Jētohō ō. De maá dē nachuhun inī ndá nú nāsa jíca nī jā cándíja nī Cristo, jín nāsa stéhēn ni nūū ndá grupo nchivī cándíja ndācá lado.

¹⁸Sochi sava nú chi sáhá téyíí nú maá nú, chi jáni inī nū jā má cuēē cuiti ni cā nūū nū.

¹⁹De nduú chi ñamā cuēē ni nūū ndá nú de tú súcuán cúnī maá Jētohō ō. Ñúcuán de nanducú nī síquī ndá tēe jā cútéyíí, de mā sáhá nī cuenta tūhun jā cáhān dē-ni, chi sa coto túnī ni dē de tú cuu squíncuu dē.

²⁰Chi jā tátúnī Yāā Dios nūū ō, chi nsūú jā cáhān ō-ni cúu, chi jínī ñúhún jā cundiso poder tūhun cáhān ō jín tiñu sáhá ó.

²¹¿Túsaá de nāsa cúnī ndá nú? ¿A jā cuxeēn ni nūū nū tá cuēē ni, síquī jāá nduú nacani inī nū, á jā nacani inī nū de cuēē ni jín tūhun cúndāhvī inī jín tūhun vitá inī?

Jā sáhá ndāā Pablo sīquī iin cuāchi

5 ¹De nī nīhīn ni tūhun jā jíca ndīi iin tēe jā íyó mähñú ndá nú, chi ndéca dē naná úu dē. De xēēn ndasí sáhá tēe jīñā, chi juni nchivī jāá nduú jínī tūhun Yāā Dios, nduú sáhá ji súcuan.

²De vísō súcuan de sáhá téyíí ndá nú maá nú. Vāha cā jā cucuéca ndasí inī nū. De cánuú jā tavā nū tēe jā sáhá cuāchi ñúcuán ná quée dē mähñú ndá nú.

³De nduhū vísō nduú íyó nī jín ndá nú, sochi modo jā íyó nī jín nú cúu jā ñúhún inī ni ndá ndóhó. De ja nī nsāhá ndāā ni sīquī tēe jā ní nsāhá cuāchi ñúcuán, chi tá-ni cúu jā íyó nī jín ndá nú cúu.

⁴Túsaá de ndutútú ndá nú, de maá Jētohō ō Jesucristo coo yā jín nú. De nduhū chi modo jā coo nī jín nú, chi ñúhún inī ni ndá nú. De poder maá Jētohō ō Jesús suni coo jín nú.

⁵De ná chíhi ó tēe jīñā ndahá Satanás, tácuā ná ndóho yiqui cúñu dē, de nacani inī dē de cācu ánō dē quivī jā ndiji Jētohō ō Jesús.

⁶Nduú vāha jā sáhá téyíí ndá nú maá nú. ¿A nduú jínī nū tūhun jā cáhān suha? Vísō jacū-ni levadura de ndāā ní ñujan sáhá, cáchī.

⁷Túsaá de tavā ndá nú tēe jīñā tá cúu nūū squéne nú levadura jā ní ntiví. De súcuan de cuu ndá nú modo pan jā cúvāha jín ñujan jée jāá nduú nā levadura yíhí, jā yáji ndá ji vico pascua. De suu súcuan cúu ndija ndá nú. Chi ja nī jīhī Cristo jā ní nsōcō yā maá yā jēhē ō, chi cúu yā modo ticāchí pascua jā ní jīhī jā jēhē ō.

⁸Túsaá de ná núcūhun inī ō nāsa nī ncuu vico ñúcuán, de ná cóo ndāā ndija ánō ō, de suu cúu tá cúu pan jāá nduú nā levadura yíhí. De mā sáhá ó tiñu néhén jín tiñu téhén jā cúu tá cúu levadura jā ní ntiví.

⁹Nūū incā carta jā ní ntee nī nūū ndá nú nī ncāhān ni jā má quívi nduū nū jín nchivī jíca ndīi.

¹⁰Sochi nduú ní ncáchī ni jā má quétáhān cuitī nū jín ndá nchivī jāá nduú cándíja jā jíca ndīi, jā ndíyo inī, jā cuíhná, jā chíñúhún ídolo. Chi tú súcuan de jínī ñúhún quee nú inī ñayiví nīcu, chi nduú nā incā modo jā cujiyo nú nūū ji chi ndéē ō ñayiví jín ji.

¹¹Chi sa nī ncachī ni jā má quívi nduū nū jín ndá máá nchivī jā cáhān ji jā cúu ji hermano, de tú jíca ndīi ji, á ndíyo inī ji, á chíñúhún ji ídolo, á sátúhún ji, á jínī ji, á cuíhná ji. De ni mā cājí cuitī nū stāā jín nchivī jā sáhá súcuan.

¹²Chi nsūú tiñu nī cúu jā sáhá ndāā ni sīquī nchivī jāá nduú íñí jín ó. Yāā Dios cúu jā sáhá ndāā sīquī ji.

¹³Sochi nchivī jā íñí jín ndá nú chi cánuú jā sáhá ndāā nū sīquī ji. Túsaá de cánuú jā tavā ndá nú tēe jā ní nsāhá cuāchi ñúcuán jā íyó dē mähñú ndá nú, ná quíhīn dē.

Jā má cáquín ji cuāchi sīquī táhán ji nūū justicia jāá nduú cándíja

6 ¹De tú táhán nú jā cándíja nī nsāhá cuāchi sīquī nū, ¿de nūcu jéhēn ndá nú jín dē nūū justicia jāá nduú cándíja? ¿De nūcu nduú sáhá ndāā ndá nú nūū táhán nú jā cándíja Yāā Dios?

²¿A nduú jínī nū jā nchivī cándíja Yāā Dios chi iin quīvī de sáhá ndāā ji tiñu nchivī ñayiví? De tú iin quīvī sáhá ndāā ndá nú tiñu nchivī ñayiví, ¿de á mā cūú sáhá ndāā nū mitan sīquī iin cuāchi lulí jā sáhá ndá táhán nú?

³¿A nduú jínī nū jā iin quīvī de sáhá ndāā ō jondē tiñu ndá ángel andiví? De nā oncā cúu tiñu ñayiví yáhá jā má cūú sáhá ndāā ō.

⁴Túsaá de tú táhán nú sáhá dē iin cuāchi sīquī nū, ¿de nūcu jéhēn ndá nú sa nūū ndá tēe jāá nduú cúu dē táhán nchivī cándíja jā sáhá ndāā dē cuāchi nú?

⁵Súcuán cáhān ni tácuā cucanoō ndá nú. ¿A nduú íyó ni iin tēe jícūhun inī māhñú ndá nú jā cuu sáhá ndāā dē sīquī nū?

⁶Nduú íyó vāha jā iin hermano caquín cuāchi sīquī incā hermano nūū justicia jāá nduú cándíja.

⁷De jā jáquín ndá nú cuāchi sīquī táhán nú, chi jā stívī ndasí nú cúu. ¿A nduú vāha cā jā cuandee inī nū jā ná sáhá ji cuāchi sīquī nū á jā candeē ji ndatíñú nú?

⁸De nduú chi sa ndá máá nú cúu jā sáhá cuāchi de candeē nū ndatíñú táhán nú, de nūū ndá hermano cúu jā sáhá nú súcuán.

⁹¿A nduú jínī ndá nú jā nchivī jāá nduú íyó ndāā, mā níhīn táhvī ji quīvi ji nūū tátúnī Yāā Dios? Mā stáhvī nú maá nú jā canī inī nū jā níhīn táhvī nū, chi ni nchivī jā jíca ndiī, ni nchivī jā chíñúhún ídolo, ni nchivī jā cásíquí ndéē táhán, ni tēe jā sáhá ndiī jín táhán yíí,

¹⁰ni nchivī cuihná, ni nchivī ndíyo inī, ni nchivī jínī, ni nchivī sátúhún, ni nchivī jā stáhvī táhán sīquī xūhún, mā níhīn táhvī ji quīvi ji nūū tátúnī Yāā Dios.

¹¹De súcuán nī iyo sava ndá nú nícu, sochi mitan chi ja nī naquete yā ndá nú, de íyó ndoo íyó īī nū nūū yā. Chi ja nī sndáhvā yā cuāchi nú nī nsāhá yā jín maá Jētohō ō Jesús jín Espíritu Yāā Dios.

Jā íyó ndoo íyó īī yiqui cúñu nchivī cándíja

¹²De ndāā cúu jā cáhān nchivī jā ndihi-ni tiñu íyó vāha jā sáhá ó tú nāsa cúnī ō. De vísō súcuán de nsūú ndihi sáhá jā quéndōo vāha ánō ō. Ndihi chi cuu sáhá ó, de vísō súcuán de nduú íyó vāha jā quívi ó nūū tiñu jā stívī ánō ō.

¹³De ndāā cúu jā cáhān nchivī jā ndeyu cúu jā cuhun chījin, de chījin cúu jā cuhun ndeyu. Sochi iin quīvī de mā cōó cā súcuán, chi naā ndúū núcuán

sāhá Yāā Dios. De nsūú sīquī jā sāhá ó tiñu ndiī cúu jā íyó yiqui cúñu ó, chi sa jā sāhá ó jā cúnī maá Jētohō ō. De Jētohō ō chi jító yā yiqui cúñu ó.

¹⁴De tá cúu nūū ní nastécū Yāā Dios Jētohō ō, suni súcuán nastécū yā yóhó jíin poder yā.

¹⁵¿A nduú jíinī ndá nú jā yiqui cúñu tá iin iin ó cúu modo ndá parte yiqui cúñu Cristo? ¿Túsaá de á cuu candeē ō iin parte yiqui cúñu Cristo de squétáhán ó jíin iin ñahan ndiī? Mā cūú cuitī súcuán.

¹⁶¿A nduú jíinī ndá nú jā tēe jā quétáhán jíin ñahan ndiī, de iin-ni cā yiqui cúñu nī nduu dē jíin ña? Chi cáhān tutū īi: Jā ndúū dē chi iin-ni cā yiqui cúñu cúu, cáchi.

¹⁷Sochi nchivī jā quétáhán jíin maá Jētohō ō, chi suni súcuán iin-ni cā cúu ji jíin yā sīquī jā cándíja ji yā.

¹⁸Túsaá de cunu ndá nú jā má quívi nú nūū tiñu ndiī. Chi ndá cā cuāchi jā sāhá nchivī, chi nsūú yiqui cúñu ji stívī ji. Sochi tú jíca ndiī ji, de sīquī yiqui cúñu ji cúu jā sāhá ji cuāchi.

¹⁹¿A nduú jíinī ndá nú jā yiqui cúñu nú cúu templo Espíritu Santo jā ní jēhe Yāā Dios nūū nū, de ndēē yā inī nū? De nsūú cuenta maá nú cúu nú.

²⁰Chi Yāā Dios chi yāhvi ndasí nī nacueen yā ndá nú. Jā ñúcuán cánuú jā caca yínúhún nú nūū Yāā Dios jā sāhá nú tiñu váha jondē jíin yiqui cúñu nú jíin inī jíin ánō nū, chi cuenta Yāā Dios cúu.

Jā cáchi tūhun sīquī yíi jíin ñasíhí

7¹Mitan de ná cáchi ní sīquī ndá tūhun jā ní jīcān tūhún ndá nú nduhū nūū carta. Jāndāā jā vāha cā quéndōo iin tēe de tú mā cúndeē dē jíin ñahan.

²Sochi sīquī jā íyó tiñu ndiī, de vāha cā jā ndācá tēe ná cóo ñasíhí maá dē, de saá-ni ndācá ñahan ná cóo yíi ña.

³De yíi ná squíncuu vāha dē nūū ñasíhí dē jā cúu dē yíi ña. De saá-ni ñasíhí ná squíncuu vāha ña nūū yíi ña.

⁴Chi ñasíhí nduú cúu sāhá ña jā cúnī ña jíin yiqui cúñu ña, chi suni jā cúnī yíi ña. De saá-ni yíi nduú cúu sāhá dē jā cúnī dē jíin yiqui cúñu dē, chi suni jā cúnī ñasíhí dē.

⁵De mā sásáhán ndá nú maá nú nūū táhán nú. Sochi tú cúnī ndúū nū jā víhí cā cācān táhvi nū jacū tiempo, de tú íyó conforme ndúū nū, de cuu sasáhán nú maá nú nūū táhán nú. De ñúcuán de vāha cā jā naquetáhán tucu nú, tácuā mā cōtó túnī Satanás ndúū nū sīquī tiñu ndiī.

⁶De nsūú jā ndácu nī tiñu jā cánuú jā coo ūū táhān nū, chi jā jēhe nī tūhun cúu.

⁷Chi jétahān inī nī jā ndá tēe ná cóo mátúhún dē-ni, tá cúu nūū íyó maá nī. Sochi sín sín nī nsāhá Yāā Dios iin iin dē nāsa cúu maá dē, chi sava dē cuu coo mátúhún dē-ni, de sava cā dē chi nduú chi sín nī nsāhá yā jíin dē.

⁸Túsaá de cáhān ni jín ndá nchivī jā íyó mátúhún-ni, jín ndá ñahan jā ní nquendōo ndáhvī, jā vāha cā de tú coo ji sūcuán-ni, tá cúu nū íyó maá nī.

⁹Sochi tú jínī ji jā má quēndá ji coo ji sūcuán-ni, de ná cóo ūū táhān ji túsaá. Chi vāha cā jā coo ūū táhān ji nsūú cā jā jīhyó ji.

¹⁰Sochi nū nchivī jā ní ncuu ūū táhān chi ndácu nī tiñu jā ñahan mā sndóo ña yíí ña. De nsūú nduhū cúu jā ndácu tiñu, chi sa maá Jētohō ō.

¹¹De tú sndóo iin ñahan yíí ña, de ná quēndōo mátúhún ña-ni, de suni cuu naquetáhān ña jín yíí ña. De yíí suni mā sndóo dē ñasíhī dē.

¹²De jín sava cā nchivī chi cáhān ni yáhā jā jáni inī maá nī, de nsūú jā ní ncachī maá Jētohō ō cúu: Tú iin hermano ndéca dē ñahan jāá nduú cándíja, de tú jétahān inī ña jā cundeē ña jín dē, de mā sndóo dē ña.

¹³De tú iin ñahan ndéca ña tēe jāá nduú cándíja, de tú jétahān inī dē cundeē dē jín ña, de mā sndóo ña dē.

¹⁴Chi tēe jāá nduú cándíja, yíhī cuenta dē nū Yāa Dios sīquī jā ní nquetáhān dē jín ñahan cándíja. De ñahan jāá nduú cándíja, suni yíhī cuenta ña nū Yāa Dios sīquī jā ní nquetáhān ña jín hermano cándíja. Chi tú nsūú sūcuán de sēhe ji mā quíhī cuenta ji nū Yāa Dios, sochi mitan chi yíhī cuenta ji nū yā.

¹⁵Sochi yíí á ñasíhī jāá nduú cándíja, tú fuerza cúu jā cúnī ji sndóo ji táhān ji, de ná sndóo ji. Chi tú sūcuán cúnī ji, de hermano á hermana cándíja nduú cánuú jā casi ji jā ndusín táhān ji jāá nduú cándíja. Chi nī ncana Yāa Dios yóhó jā cundeē mānī ō jín táhān ó.

¹⁶Chi ndóhó jā cúu nú ñasíhī, nduú jínī nū, sanaā de candíja yíí nú sāhá nú, de cācu dē. De saá-ni ndóhó jā cúu yíí, nduú jínī nū, sanaā de candíja ñasíhī nú sāhá nú, de cācu ña.

¹⁷Túsaá de tá iin iin nú ná quēndōo nú nāsa nī nsāhá Jētohō ō ndóhó, jín nāsa-ni íyó nú tá nī ncana yā ndá nú jā ní ncandíja nú. De sūcuán ndácu nī nū ndācá grupo nchivī cándíja.

¹⁸Tú nī ncana yā iin tēe jā ní ncuu circuncidar, de sūcuán ná quēndōo dē. De tú nī ncana yā iin tēe jāá nduú ní ncúu circuncidar, de mā cūú dē circuncidar.

¹⁹Chi nduú nā cuá sāhá á cuu ó circuncidar á nduú, chi jā cánuú cā cúu jā squíncuu vāha ó tiñu jā cúnī Yāa Dios.

²⁰Tá iin iin nú ná quēndōo nú nāsa-ni íyó nú tá nī ncana yā ndá nú nī ncandíja nú.

²¹Tú mozo jā ní jeen nchivī cúu nú tá nī ncana yā ndóhó, de mā cúndihvī inī nū jā quee nú. Sochi tú íyó modo jā nduu libre nū, de íyó vāha jā sāhá nú.

²²Chi tēe cúu mozo jā ní jeen nchivī, de tú nī ncana Jētohō ō dē, de mitan chi nī nduu libre dē nū cuáchi dē, de jétíñú maá Jētohō ō dē. De saá-ni

tēe sátíñú cuenta maá, de tú nī ncana yā dē, de mitan de nī nduu dē mozo nūū Cristo jā ní nacueen yā dē.

²³Chi yāhvī nī ncuu jā ní nacueen Yāa Dios ndá ndóhó. Túsaá de mā sátíñú nú nūū tiñu cāhá jā ndácu nchivī ñayiví.

²⁴Túsaá hermano, tá iin iin nú ná quéndōo nú nūū Yāa Dios nāsa-ni íyó nú tá nī ncana yā ndá nú.

²⁵De mitan de sīquī nchivī jā íyó mátúhún-ni, de nduú nā tūhun ní ndácu maá Jētohō ō nūū ni. Sochi ná cāhān ni jā jāni inī maá nī, chi nī ncundáhvī inī Jētohō ō nduhū, de nī nsāhá yā jā cuu cāhān ndāa ni.

²⁶Jāni inī ni jā vāha-ni quéndōo ndá tēe tú nāsa-ni íyó dē, jā sīquī jā íyó tūndóhó ndá tiempo yáhá.

²⁷Tú íyó ñasíhí nú, de mā sndóo nú ña. De tú nduú nā ñasíhí nú íyó, de mā nducú nú ña.

²⁸Sochi tú coo ñasíhí nú, de nsūú cuāchi cúu. De tú quetáhán iin ñahan lúli jín tē, de suni nsūú cuāchi cúu. Sochi nchivī jā íyó ūū táhān, chi nīhīn ji tūndóhó ñayiví yáhá, de cúnī ni jā má nīhīn nū tūndóhó.

²⁹Hermano, tūhun jā cāhān ni yáhá cúu jā yachī-ni ndihi tiempo jā sāhá ó tiñu yā. Túsaá de jondē mitan de tēe jā íyó ñasíhí, ná cúndihvī cā inī dē sīquī tiñu maá yā nsūú cā sīquī ña.

³⁰De nchivī jā ní jīhī táhán vehe, ná sáhá ji modo jāá nduú cúcuécá inī ji. De nchivī jā cúsiī inī, ná sáhá ji modo jāá nduú-ni. De nchivī jéen, ná sáhá ji modo jāá nsūú ndatíñú ji cúu. Mā cuáha ji tūhun jā casī ndá ñúcuán jā má cúndihvī inī ji sīquī tiñu maá yā.

³¹De nchivī jā ní ndihvī inī sīquī ndatíñú ñayiví yáhá, mā cútéñú cā ji jín. Chi ja ñatin naā ndācá jā íyó inī ñayiví yáhá.

³²Cúnī ni jā má nācani ndasí inī ndá nú sīquī ndācá jā íyó inī ñayiví. Chi tēe cúu soltero, ndíhvī inī dē tiñu maá Jētohō ō, nāsa cusī inī Jētohō ō sāhá dē.

³³Sochi tēe íyó ñasíhí, chi ndíhvī inī dē tiñu jā íyó ñayiví, nāsa cusī inī ñasíhí dē sāhá dē.

³⁴De suni súcuán sín sín jāni inī ñahan íyó yí jín ñahan íyó maá. Chi ñahan íyó maá, ndíhvī inī ña tiñu maá Jētohō ō, chi cúnī ña jā coo ndoo coo iī ánō ña jín yiqui cúñu ña jā sāhá ña tiñu maá yā. Sochi ñahan íyó yí chi ndíhvī inī ña jín tiñu jā íyó ñayiví, nāsa cusī inī yí ña sāhá ña.

³⁵Jā váha ndá máá nú cúu jā cāhān ni súcuán. Chi nsūú jā ndúcú nī casī ni jā coo ūū táhān nū, chi sa cúnī ni jā caca yínúhún nú de nune nú jā sátíñú cutú nú nūū maá Jētohō ō jondē jín inī jín ánō nū.

³⁶De tú iin tēe íyó sēhe síhí dē, de tú cuāyāha cuiyā ji, de tú jāni inī dē jā vāha cā jā coo yí ji, túsaá de ná sáhá dē jā jāni inī dē, de ná cuáha dē tūhun jā coo yí ji, chi nsūú cuāchi cúu.

³⁷Sochi tú iin tēe nī ncundaā inī dē jā cundeē sēhe síhí dē súcuán-ni, jā má cuáha dē ji vísō jícān fuerza nchivī ji, túsaá de cuu quendōo ji tá cúu nūū cúnī dē, chi vāha-ni sáhá dē.

³⁸Túsaá de tēe jā jēhe tūhun jā coo yíí ji, vāha-ni sáhá dē. De tēe jāá nduú jēhe tūhun, chi vāha cā sáhá dē.

³⁹De ñahan jā íyó yíí, chi yíhí ña ndahá yíí ña juni tēcū dē. Sochi tá ja nī jīhī yíí ña, ñúcuán de ja nī ncuu libre ña jā quetáhán tucu ña jín nā-ni tēe cúnī ña, de tú tēe cándíja nūū maá Jētohō ō cúu dē.

⁴⁰Sochi jáni inī ni jā ndetū cā coo ña de tú quendōo ña súcuán-ni. De suni jáni inī ni jā jín Espíritu Yāa Dios cúu jā cáhān ni.

Siqui cūñu jā ní nsōcō nūū ídolo

8 ¹De mitan de ná cáchī ni sīquī cūñu jā ní nsōcō nūū ídolo. Ndāa chi ndācá ó jáni inī ō jā jínī vāha ó nāsa cúu. De ndācá jā jínī ō ñúcuán, chi ndúcú sáhá vixī yóhó. De sa jā cúndáhvī inī ō táhán ó, ñúcuán sáhá jā jíja ó jín tūhun yā.

²Tú nā-ni nchivī jáni inī ji jā jínī vāha ji, de nduú chi ncháha ca cunī cuitī ji tá cúu nūū cánuú cunī ji.

³De sa nchivī jā mānī jín Yāa Dios, maá ji cúu jā jétáhvī yā.

⁴Túsaá de ná cáchī tūhun nī sīquī cūñu jā ní nsōcō nchivī nūū ídolo. Ndāa chi jínī ō jā ndācá ídolo ñayiví, nduú ndāa cuitī. De nduú nā incā yāa íyó, chi mátúhún-ni Yāa Dios.

⁵De nchivī chi jáni inī ji jā íyó ndācá yāa inī andiví jín ñayiví, chi cáhān ji jā íyó cuāhā ndija ndá yāa ji jín jētohō ji.

⁶Sochi nūū ndá máa ó chi mátúhún-ni Yāa íyó, jā cúu Tatá ó Yāa Dios. De maá yā nī nsāhá ndācá jā íyó, de cuenta maá yā cúu ndācá ó. De suni íyó iin-ni Jētohō ō Jesucristo, de jondē nūū maá yā vāji ndācá jā íyó, de suni maá yā nī nsāhá yóhó.

⁷De nchivī cándíja, chi nsūú ndihi ji jínī tūhun yáhá. Chi sava ji nī ncāan ji nī nchiñúhún ji ídolo jondē ncháha ca cándíja ji. De jondē mitan de tú yájī ji cūñu ñúcuán de sáhá ji cuenta jā ní nsōcō nūū ídolo cúu. De sīquī jāá ncháha ca cuja ji jín tūhun Yāa Dios, de jáni inī ji jā cutéhén ánō ji sáhá cūñu jā ní nsōcō nūū ídolo.

⁸De ndāa chi nsūú jā yájī ō cúu jā sáhá jā cuetáhvī Yāa Dios yóhó. Chi tú yájī ō, de nsūú ñúcuán sáhá jā quendōo vāha cā ō nūū Yāa Dios. De tú nduú yájī ō, de suni nduú sáhá jā quendōo núu cā ō nūū yā.

⁹De vísō ni iin nduú jási jā cajī nū cūñu ñúcuán, sochi coto nú táhán nú jāá ncháha ca cuja jín tūhun yā, de mā sáhá nú jā suni cajī ji vísō jáni inī ji jā cuāchi cúu.

¹⁰Vāha cā mā cājí nú túsaá, chi sanaā de hermano nū jāá ncháha ca cuja jíin tūhun yā, cunī dē ndóhó jā yājí nū inī vehe nūū íyó ídolo, chi jínī vāha nú jāá nduú nā cuá sáhá. De súcuán de sáhá nú jā cuu inī dē jā suni cājí maá dē cūñu jā ní nsōcō nūū ídolo, vísō jáni inī dē jā cuāchi cúu.

¹¹De súcuán de stíví nú ánō hermano nū jāá ncháha ca cuja jíin tūhun yā, vísō jínī vāha maá nú jāá nduú nā cuá sáhá jā cājí nū. De nduú vāha jā sáhá nú súcuán, chi suni jēhē maá dē nī jīhī Cristo.

¹²De tú súcuán stíví nú ánō hermano nū jāá ncháha ca cuja jíin tūhun yā, túsaá de sīquī maá Cristo cúu jā sáhá nú cuāchi.

¹³Túsaá de tú cūñu ñúcuán sáhá jā quívi hermano nī cuāchi, de mā cājí cuitī cā nī cūñu ñúcuán, tácuā mā sáhá nī jā quívi dē cuāchi.

Sīquī jā íyó derecho ndá apóstol

9 ¹De maá nī chi jīca libre nī, de íyó derecho nī sīquī jā cúu nī apóstol, tēe jā ní ntají yā jā scáca tūhun yā. Chi nī jinī nī nūū maá Jētohō ō Jesús, de ndá máá nú cúu tiñu jā ní nsáhá nī jā ní squívi nī ndá nú ndahá Jētohō ō.

²De tú sava cā nchivī nduú jétáhví ji jā cúu nī apóstol, sochi nūū ndá máá nú chi suu cúu ndija nī. Chi sīquī jā ní scándíja nī ndá nú, de jā ñúcuán cúu nú prueba jā stéhēn jā ndíso tíñú nī jā cúu nī apóstol nūū maá Jētohō ō.

³De tūhun yáhá cáhān nī jēhē maá nī nūū ndá nchivī jā cáhān sīquī nī:

⁴Cáchī nī jā íyó derecho nī jā cājí nī coho nī jā táji nchivī de tú cúnī nī.

⁵De suni íyó derecho nī tú cúnī nī cundeca nī iin hermana cándíja cuu ñasíhí nī, de caca ndúū nī jíin ña, tá cúu nūū íyó ñasíhí Pedro jíin ndá cā apóstol jíin ndá tēe cúu ñanī maá Jētohō ō.

⁶¿A jáni inī ndá nú jā maá-ni nduhū jíin Bernabé cúu jāá nduú nā derecho jā sndóo nī tiñu sáhá nī jā cutecū nī, tácuā nune cā nī jā nacani nī tūhun vāha yā, á naá cúu?

⁷¿A íyó soldado jā técu dē xūhún vehe dē? ¿A íyó tēe jā jítu yūcū uva de nduú yājí dē uva? ¿A íyó tēe jā scájí ticāchí de nduú jíhi dē leche tī? Nduú cuitī. De saá-ni nduhū, ¿á nduú íyó derecho nī jā cutecū nī sīquī tūhun yā, á naá cúu?

⁸De mā cānī inī ndá nú jā ndācá jā cáhān nī yáhá, maá-ni tūhun jā cáhān nchivī ñayiví cúu. Chi jondē maá ley yā jā ní jēhe yā nūū Moisés, suni súcuán cáhān.

⁹Chi cáhān nūū tutū ley yā: Mā chūhún nú ñunu yuhú stíquī, quiti jáxīn trigo, cáchī. De ndāā chi nsūú maá-ni sīquī stíquī cúu jā ní ncāhān yā súcuán.

¹⁰Chi suni sīquī maá ó nī ncāhān yā. Chi ley ñúcuán nī jēhe yā jā vāha yóhó, chi stéhēn jā tēe jítu jíin tēe jáxīn trigo, cánuú jā nīhīn dē sava ñúcuán quívi jā ndutútú.

¹¹De suni súcuan ndá nduhū jā ní jaquīn ni tūhun Espíritu inī ánō nū, ¿de á tiñu vee cúu nūū ndá nú tú nastútú nī nūū nū jā cutecū ni?

¹²De tú sava cā tēe jā stēhēn nūū nū, íyó derecho dē jā cācān dē nūū nū, de nā oncā cúu ndá nduhū jā má cōó derecho ni jā cācān ni. Sochi nduú ní jícān ndá nī derecho ñúcuán, chi sa nī jendeé inī ni jā cajī ni cuenta maá nī, tácuā mā cāsī nī jā caca tūhun vāha Cristo.

¹³De jínī ndá nú jā ndá sūtū jā sátíñú inī templo, nī ntecū ndá dē sīquī ndācá jā ní nsōcō nchivī inī templo. Chi ndá sūtū jā ní nsatíñú nūū altar nūū ní nsōcō ji quiti, suni nī nchajī dē sava quiti ñúcuán.

¹⁴De suni súcuan nī ndacu maá Jētohō ō tiñu jā ndá tēe nácani tūhun jā scácu yā yóhó, sīquī tiñu ñúcuán nīhīn dē jā cutecū dē.

¹⁵Sochi nduhū chi nduú ní jícān cuitī ni derecho ni yáhá, de suni nsūú jā tēe nī tūhun yáhá nūū ndá nú jā taji nú nūū ni. Chi jáni inī ni jā vāha cā ná cúu ni nsūú cā jā quehen nī jā taji ndá nú, chi casī jā cúsiī inī ni jā scáca nī tūhun yā súcuan-nī.

¹⁶De nduú vāha tú sáhá téyíī nī maá nī sīquī jā nácani nī tūhun jā scácu yā yóhó. Chi jā ní ntetíñú yā nduhū cúu, de cánuú jā squíncuu nī. Chi nācā ndáhvī nī de tú mā nácani nī tūhun yā.

¹⁷De tú jā cúu inī maá nī cúu jā nácani nī, ñúcuán de cuu cācān ni yāhvi nī nícu. De nduú chi cánuú jā squíncuu nī, chi maá Yāa Dios nī ntee tiñu nduhū.

¹⁸Túsaá de yāhvi nī cúu jā cúsiī inī ni jā súcuan-nī nácani nī tūhun jā scácu yā yóhó, de nduú jícān ni derecho ni jā cutecū ni sīquī jā nácani nī tūhun yā.

¹⁹Chi vísō ni iin nchivī nduú tátúnī nūū ni, sochi nī nsáhá nī maá nī mozo nūū ndācá ji jā nácani nī tūhun nūū ji, tácuā nīhīn ni cuāhā ji jā candíja ji Cristo.

²⁰De tá íyó nī jín ndá táhán nī hebreo, de sáhá nī tá cúu nūū sáhá maá ji, tácuā cuu scándíja nī ji. Chi násāhá nī maá nī modo tēe jā yíhí chījin ley Moisés, tácuā cuu scándíja nī ji jā yíhí ji chījin ley ñúcuán, vísō nduú cā yíhí maá nī chījin ley.

²¹De suni násāhá nī maá nī modo nchivī jāá nduú yíhí chījin ley Moisés, tácuā cuu scándíja nī nchivī ñúcuán. De vísō súcuan de yíhí nī chījin ley Yāa Dios, chi suu cúu ley Cristo jā squíncuu nī.

²²De tá íyó nī jín nchivī jāá ncháha ca cuja jín tūhun yā, de sáhá nī maá nī modo jā suni ncháha ca cuja nī, tácuā cuu scándíja cā ni ji. Túsaá de násāhá nī maá nī tú nāsa íyó ndācá nchivī, tácuā jín ndācá-nī modo ñúcuán de cuu scándíja nī sava ji.

²³Ndācá yáhá sáhá nī jā sīquī tūhun jā scácu yā yóhó, tácuā suni nīhīn ni tāhvi jā ndíso tūhun yā.

²⁴De jínī ndá nú jā ndá tēe jā jínu carrera, de ndāā chi ndihi dē jínu, sochi iin dē-ni cundeé jā nīhīn premio. De suni sūcuán nducú ndéé ndá máá nú squíncuu nú, tácuā nīhīn nū premio nūū yā.

²⁵De ndācá tēe jā cúnī cundeé sīquī iin deporte, chi scuáha dē de jító dē maá dē. Sūcuán sáhá ndá dē tácuā nīhīn dē iin premio jā cúu corona ndahá yúcū ñutun jā ñamā naā. Sochi ndá máá ó sa ndúcú ndéé ó tácuā nīhīn ō iin premio jā má náā cuitī.

²⁶De saá-ni maá nī, suni ndúcú ndéé nī modo tá sáhá tēe jínu, de nduú ndúcú ndéé cāhá nī. De sáhá nī tá sáhá ndá tēe cánāā juego jāá nduú jéhe íyú dē, chi quée tiñu jā sáhá nī.

²⁷Chi sa sndóho nī yiqui cúñu nī, de sndíhvī inī ni maá nī jā squíncuu nī. Chi vísō sndíhvī inī ni incā nchivī jā nducú ndéé ji, de tú nduú ndúcú ndéé maá nī, de snāā ni premio ni.

Siquī jā má chíñúhún ji ídolo

10 ¹Hermano, cúnī ni jā ná jícūhun inī ndá nú nāsa nī jica ndá tatā ō jondē janahán. Chi ndihi ji nī jica chíjin vīcō jā ní stéhēn ichi nūū ji, de ndihi ji nī nchāha māhñú ndute Mar Rojo jā ní ncusín de nī nune ichi.

²De sūcuán cúu jā ní nduu inuú ndá ji jín Moisés, chi nī niquīn ji dē chíjin vīcō jín māhñú mar.

³De ndihi ji chi inuú-ni nī nchajī ji alimento jā ní jēhe maá Espíritu.

⁴De suni ndihi ji nī jīhi ndute jā ní jēhe Espíritu. Chi nī jīhi ji ndute jā ní nquene yīcā cava nūū ní jica nuu ji. De Cristo cúu tá cúu cava ñúcuán jā jéhe yā ndute jā cutecū ō ní cání.

⁵De vísō sūcuán de cuāhā ji nī ncunīhin inī, de nduú ní ncúsiī inī Yāā Dios jín ji, de jā ñúcuán cúu jā ní jīhī ji nūū ñuhun tíhá.

⁶De ndācá jā ní ncuu ñúcuán, chi iin ejemplo cúu nūū ō, tácuā mā ndíyo inī ō ndācá jā nēhén, tá cúu nūū ní ndíyo inī ndá ji.

⁷De mā chíñúhún ndá nú ídolo, tá cúu nūū ní nsāhá sava ji. Chi sūcuán cáhān nūū tutū īī: Nī jēcundeē ndá nchivī, nī nchajī ji nī jīhi ji vico ídolo, de nī nacuiñī ji nī jita jéhe ji nūū, cáchī.

⁸De nī mā cācá ndīī ō tá cúu nūū ní nsāhá sava ndá ji, de nī jīhī ōcō ūnī mil ji jā iin-ni quīvī.

⁹De nī mā sáhá ó tiñu jā squítī inī ō Jētohō ō, tá cúu nūū ní nsāhá sava ji, de nī jīhī ji jā ní ntiin cōō ji nī nsāhá yā.

¹⁰De nī mā cáhān sōó nú sīquī Yāā Dios, tá cúu nūū ní ncāhān sōó sava ji, de nī jīhī ji jā ní jahnī ángel yā ji.

¹¹De ndācá jā ní ncuu ñúcuán, chi iin ejemplo cúu nūū ō. De sūcuán yósō nūū tutū tácuā ná chúhun vāha inī maá ó. Chi ndá máá ó cúu nchivī tēcū quīvī jā cuándihi ñayiví.

12Túsaá de ndá ndóhó jā jāni inī nū jā íñi nihin nú jāá nduú sáhá nú cuāchi, de coto má quívi nú cuāchi.

13Chi íyó jā ndúcú squívi ndá ndóhó nū cuāchi, de inuú-ni ndóho ndá nú súcuán jondē jíin ndá cā nchivī. Sochi cuu cundeé cucáhnú inī nū maá Yāa Dios, chi mā cuáha yā tūhun jā caa cā coto túnī Satanás ndóhó, chi maá medida-ni jā cuu cundeé nú jíin. Chi sa tú vāji jā ndúcú squívi ndóhó cuāchi, de chindeé yā ndóhó jā quee nú de cundeé nú sīquī.

14Ñanī mánī, mā chíñúhún cuitī ndá nú ídolo túsaá.

15Cáhān ni jíin ndá nú jā cúu nú nchivī jā jícūhun inī, de sáhá nú cuenta de tú íyó ndāa tūhun jā cáhān ni.

16Maá vaso īī jā nácuetáhvi ó jēhē, suu jíhi cáhnú ó jā stéhēn ō jā inuú-ni cúu ndihi ó chi nī jati nīñī Cristo jā sīquī ō tá nī jihī yā yicā cruz. De stātílā jā scuáchi ó, jā yáji cáhnú ó, suu stéhēn jā inuú cúu ndihi ó sīquī jā ní jēhe Cristo yiqui cúñu yā nī jihī yā jēhē ō.

17De vísō cuāhā ō íyó, de iin-ni nchivī cúu ó, chi iin-ni stātílā núcuán yáji cáhnú ó sīquī jā cándíja ó.

18Cūndēhé ndá nú nāsa sáhá nchivī Israel. Ndá nchivī jā yáji quiti jā ní nsōcō nū yā, chi inuú-ni cúu ndihi ji sīquī jā yáji ji jā ní nsōcō núcuán.

19De cáhān ni jāá nduú ná jétíñú ídolo, de suni nduú ná jétíñú cúñu jā ní nsōcō nū ídolo, chi inuú-ni cúu jíin ndācā cā cúñu.

20De suni cáhān ni jā nchivī jāá nduú jínī tūhun Yāa Dios, tá sócō ji, de nū tāchī sócō ji, nsūú nū Yāa Dios. De nduú cúnī ni jā quívi nduū ndá nú jíin tāchī.

21Mā cūú coho ndá nú vaso maá Jētohō ō de tú jíhi nú jā ní nsōcō nū tāchī. De mā cūú caji nū nū mesa Jētohō ō de tú yáji nū jā ní nsōcō nū tāchī.

22Mā quívi nduū ō súcuán jíin tāchī, tácuā mā sáhá ó jā cucuíñú Jētohō ō yóhó. ¿A jāni inī nū jā íyó téyí cā maá ó nsūú cā maá yā jā má cūú cuāha yā castigo yóhó, á naá cúu?

Ndihī-ni chi sáhá ó jíin tūhun cúndáhvī inī

23De ndāa cúu jā cáhān nchivī jā ndihī-ni tiñu íyó vāha jā sáhá ó tú nāsa cúnī ō. De nduú chi nsūú ndihī sáhá jā quendōo vāha ánō ō. Ndhī chi cuu sáhá ó, de vísō súcuán de nsūú ndihī sáhá jā cuja táhān ó jíin tūhun yā.

24Chi cánuú jā sáhá ó jā vāha táhān ó, nsūú maá-ni jā vāha maá ó.

25Cuu caji ndá nú ndihī-ni cúñu jā cúyāhvi nū yāhvi, de mā cātūhún nú de ni mā cānī inī nū á jā ní nsōcō nū ídolo cúu.

26Chi cuenta maá Jētohō ō cúu ñayivī jíin ndiviī jā íyó inī, de cuu cuetíñú ó.

27De tú iin tēe jāá nduú cándíja cana dē ndóhó jā caji nū jíin dē, de tú cúnī nū quihīn nū, túsaá de caji nū ndācā jā canī dē nū nū. De mā cātūhún nú de ni mā cānī inī nū á jā ní nsōcō nū ídolo cúu.

²⁸Sochi tú cachī iin-ji nūū nū jā cūñu jā ní nsōcō nūū ídolo cúu, ñúcuán de mā cājí nú, chi sīquī jā jāni inī ji jā cuāchi cúu, de sīquī jāá nduú cúnī nū jā quīvi ji cuāchi.

²⁹De súcuán cáhān ni sīquī jā incā ji jāni inī jā cuāchi cúu, vísō nsūú súcuán jāni inī maá nú. De sanaā de cáhān iin nú: ¿A nduú íyó libre ni jā caji ni jā cúnī maá nī, vísō jāni inī incā ji jā cuāchi cúu?

³⁰De tú nácuetáhvi nī nūū Yāa Dios de yājī ni, ¿de nājēhē cáhān ji sīquī ni jā yājī ni? cachī nū.

³¹Nduú chi ndihi jā sáhá nú, vísō jā caji nū á jā coho nú, á nā-ni tiñu sáhá nú, de ndihi-ni sáhá yíñúhún nú jín Yāa Dios, tácu cunī nchivī jā viī cúñáhnú yā.

³²De mā sáhá nú tiñu jā squívi nú nchivī nūū cuāchi, cúu nchivī hebreo, cúu nchivī ndá nación jāá nduú jínī tūhun Yāa Dios, cúu nchivī cándíja Yāa Dios.

³³De nduhū chi ndúcú nī jā ná cúsi inī ndācá nchivī jín ndá tiñu jā sáhá nī. Nduú ndúcú nī jā váha maá nī-ni, chi sa ndúcú nī jā sáhá nī jā váha cuāhā nchivī, tácu cācu ndá ji.

11 ¹De ndacu ndá nú nduhū, tá cúu nūū ní ndacu maá nī Cristo.

Sīquī nāsa cánuú sáhá ndá ñahan jā ndútútú

²Váha sáhá ndá nú, hermano, jā níní núcūhun inī nū nduhū, de ndíhvī inī nū jín ndá tiñu jā ní stéhēn ni nūū nū.

³Sochi cúnī ni jā ná jícūhun inī ndá nú jā Cristo cúñáhnú nūū ndācá tē. De tē cúñáhnú dē nūū ñasíhí dē. De Yāa Dios cúñáhnú yā nūū Cristo.

⁴Tú iin tē ñúhún dē xíní dē tá jícān táhvī dē á nácani dē tūhun nūū ndútútú nchivī cándíja, túsaá de jéhe dē tūhun canoō maá dē.

⁵Sochi iin ñahan, tú nduú ndásī xínī ña tá jícān táhvī ña á nácani ña tūhun, túsaá de jéhe ña tūhun canoō maá ña, chi iin-ni cúu ñúcuán jín jā sēté xínī ña.

⁶Chi tú mā cásī ña xínī ña, de váha cā ná sēté ndihi ña xínī ña túsaá. De tú cúcanoō ña jā sēté ña xínī ña á jā sēté ñíí ña, de ná cásī ña túsaá.

⁷Sochi tē chi mā cásī dē xíní dē, chi maá dē cúu muestra jā stéhēn nāsa cúu Yāa Dios jā cúñáhnú yā. De ñahan chi sa stéhēn ña jā cúñáhnú tē.

⁸Chi tá nī nsáhá yā tē, de nsūú jín yiqui ñahan ní nsáhá yā, chi sa jín yiqui tē nī nsáhá yā ñahan.

⁹De ñahan chi nī ncuvāha ña jā síquī tē, nsūú tē jā síquī ñahan.

¹⁰De jā ñúcuán cánuú jā cundasī xínī ñahan, de suu stéhēn jā cúñáhnú tē, chi suni ndéhé ndá ángel yā nāsa sáhá ña.

¹¹De vísō súcuán de yóhó jā cándíja ó chi jínī ō jā má cōó tē de tú nduú ñahan, de mā cōó ñahan de tú nduú tē.

¹²Chi vísō nī nsāhá yā ñahan jín yiqui tē, de mitan chi cácu tē chijin ñahan, de maá Yāa Dios cúu jā sáhá ndācá-ni.

¹³Sāhá ndá máá nú cuenta, ¿á íyó vāha de tú nduú ndásī xīnī ñahan tá jícān táhvī ña nū Yāa Dios?

¹⁴Chi sáhá ó cuenta jā inī ñayiví yáhá, tú cání ixi tē de cúcanoō dē sáhá.

¹⁵Sochi ñahan chi sa viī cáá ña de tú cání ixi ña, chi suu nī jēhe yā jā cundasī xīnī ña.

¹⁶De tú ní iin nchivī cúnī ji cāhān ji sīquī tūhun yáhá, de ndá nduhū jín ndá grupo nchivī jā cándíja nū Yāa Dios, nduú nā incā costumbre jétúhún nī sīquī tūhun yáhá.

Jā stíví ndá ji sīquī Cena Jētohō ō

¹⁷De íyó incā tūhun jā cánuú jā cāhān nī jín ndá nú, chi nduú cúu cāhān nī jā vāha sáhá nú. Chi tá ndútútú ndá nú de nduú sáhá jā quéndōo vāha cā nū, chi sa jā stíví ndá nú.

¹⁸Xihna cā tūhun yáhá cāhān ni, chi níhīn nī tūhun jā tá ndútútú ndá nú de cúsin inī nū. De jáni inī nī jā ndāá cúu.

¹⁹Chi níní coo sava nú jā cusín inī, tácuā natūu ní-nī nchivī cúu jā cándíja vāha māhñú ndá nú.

²⁰De jā cúsin inī ndá nú súcuan tá ndútútú nú, de nsūú cena maá Jētohō ō cúu jā yáji nū túsaá.

²¹Chi tá yáji ndá nú, de tá iin iin nú cúnī jā caji xihna cā nsūú cā ndá táhán nú. De súcuan de sava nú nduú níhīn, de jīhī sōco, de sava nú jīni jā jīhi cuāhā.

²²¿A nduú névāha ndá nú vehe nū caji nū coho nú, á naá cúu? Chi jā sáhá ndá nú súcuan cúu jāá nduú íyó yínúhún nú inī vehe nū ndútútú nchivī jā cándíja Yāa Dios, chi sáhá nú jā cúcanoō nchivī jāá nduú ná névāha. ¿Nāsa cāhān nī jín ndá nú túsaá? ¿A cāhān nī jā vāha sáhá nú? Nduú chi nsūú jā vāha cúu jā sáhá ndá nú súcuan.

Sīquī jā ní jaquīn Jētohō ō Cena yā

(Mt. 26.26-29; Mr. 14.22-25; Lc. 22.14-20)

²³Chi tūhun yáhá jā ní nastéhēn nī nū ndá nú, chi nū maá Jētohō ō nī níhīn ni: Jā maá jacuāā jā ní nastúu dē Jētohō ō Jesús, de nī nquehen yā stātílā.

²⁴De xihna cā nī nacuetáhvī yā nū Tatá yā, de nī scuáchi yā, de nī ncāhān yā jín ndá tē scuáha jín yā: Quehen de caji ndá nú, chi yáhá cúu yiqui cúñu nī jā ní nsōcō nī jā sīquī ndá nú. De níní caji ndá nú súcuan jā nūcūhun inī nū nduhū jā ní jīhī nī jēhē nū. Ncachī yā.

²⁵De suni súcuan nī nquehen yā vaso tá nī ncuu nī ncuxíní yā jín ndá dē, de nī ncāhān yā: Jā nūhún vaso yáhá cúu nīnī nī jā sáhá cutú trátū jeé jā scácu nī nchivī. De ndācá vuelta tá jíhi ndá nú, de nūcūhun inī nū nduhū. Ncachī yā.

²⁶Chi ndācá vuelta jā yájī ndá nú stātílā nūcuán de jíhi nú vaso nūcuán, chi súcuan stéhēn nū jā ní jīhī Jētohō ō jēhē ō. De súcuan sáhá ndá nú jondē quivī jā nenda yā.

Siqui nāsa cajī yínúhún ji Cena yā

²⁷De tú nā-nī nchivī cajī ji stātílā nūcuán á coho ji vaso Jētohō ō nūcuán, de tú nduú sáhá yínúhún ji nū Yāā Dios, túsaá de sáhá ji cuāchi jāā nduú íyó yínúhún ji sīquī yiqui cúñu maá Jētohō ō jín sīquī nīnī yā.

²⁸Túsaá de coto túnī ndá nú maá nú tú íyó ndoo ánō nū jāā nduú nā cuāchi nú. De sá de cuu cajī nū stātílā nūcuán de coho nú vaso nūcuán.

²⁹Chi tú iin nchivī nduú yájī nduú jíhi yínúhún ji de nduú nūcūhun inī ji jā yiqui cúñu yā cúu, de nchivī nūcuán chi nīhīn ji castigo tú cajī ji coho ji.

³⁰Jā nūcuán cúu jā íyó cuāhā nchivī cúhū jín nchivī íyó xií māhñú ndá nú. De sava ji ja nī jīhī.

³¹Sochi tú coto túnī ō maá ó jondē ncháha ca cajī ō, de Jētohō ō chi mā cuáha yā castigo yóhó.

³²De tú maá Jētohō ō jéhe yā castigo nū ō, de súcuan sndóho yā yóhó tácuā mā tánū tāhvī ō jín nchivī ñayivī.

³³Nanī mánī, túsaá de tá ndútútú ndá nú jā cajī nū cena yā, de cundetu táhán nú tácuā cajī inuú nú.

³⁴De tú iin nchivī jíhī ji sōco, de xihna cā vehe ji ná cáji ji, tácuā mā stívī ji nū ndútútú ndá nú. De súcuan de mā cuáha yā castigo ji. De quivī jā cuēē nī nū ndá nú, de cachī nī nāsa coo sava cā tiñu.

Siqui ndá tāhvī jā jéhe Espíritu

12 ¹Hermano, cúnī nī jā ná jícūhun inī ndá nú sīquī ndācá tāhvī jā jéhe Espíritu Santo nū ō, suu ndācá modo jā sātínú iin iin ó nū Yāā Dios.

²De jínī ndá nú jā tá nī ncuu nú nchivī jāā nduú cándíja, de nī ndihvī inī nū nī nchiñúhún nú ndá ídolo nīhín.

³De mitan de ná jícūhun inī nū jā tú ní nchivī cáhān nāvāha ji sīquī Jesús, de nsūú jín poder Espíritu Yāā Dios cúu jā cáhān ji súcuan. De nī iin ji suni mā cūú cáhān ji jā Jētohō ji cúu Jesús, de tú nduú ndēē poder Espíritu Santo inī ji.

⁴De sín sín tāhvī jéhe yā jā sáhá iin iin ó tiñu yā, sochi iin-nī maá Espíritu Santo cúu jā jéhe.

⁵De síin síin tiñu sáhá iin iin ó, sochi nūū iin-ni Jētohō ō sātíñú ndācá ó.

⁶De síin síin modo sáhá ó tiñu yā, sochi iin-ni Yāā Dios cúu jā sáhá ndá tiñu ñúcuán jíin ó.

⁷De nūū tá iin iin ó nī jēhe Yāā Dios tāhvī jā sáhá Espíritu yā jíin ó, tácuá ná sáhá ó jā cuja ndá táhán ó jíin tūhun yā.

⁸Chi sava ó nī nīhīn ō tāhvī jā cáhān ndichí ó tūhun yā, jā sáhá maá Espíritu. De sava cā ō nī nīhīn ō jā cúu jícūhun vāha inī ō de cáchī tūhun ó, de suni maá Espíritu sáhá.

⁹De nūū sava cā ō nī jēhe yā tāhvī jā cúu cándíja nīhīn ó jā squíncuu yā jā jícān ō, de sava cā ō cúu sáhá ó jā ndúvāha nchivī cúhū, de suni maá Espíritu sáhá.

¹⁰De sava cā ō cúu sáhá tiñu ñáhnú jíin poder Yāā Dios. De sava cā ō cúu nácani tūhun yā. De sava cā ō nī nsáhá yā jā nácunī ō ndācá tūhun, tú vāji nūū Espíritu yā á nduú. De sava cā ō nī nīhīn tāhvī jā cáhān ō quéhén yuhú jāá nduú jícūhun inī ō. De sava cā ō cúu nácachī tūhun ó tūhun jā ní ncāhān táhán ó jíin incā yuhú.

¹¹De ndācá tāhvī yáhá, chi iin-ni maá Espíritu cúu jā sājī, de síin síin jēhe yā nūū iin iin ó, nāsa jétahān inī maá yā.

Ndihi ó cúu tá cúu iin-ni cā yiqui cúñu

¹²Chi tá cúu nūū cúu iin yiqui cúñu jā íyó cuāhā parte, súcuán cúu ó jíin Cristo jā cúu ó modo yiqui cúñu yā, chi iin-ni cā cúu ó jíin yā. De vísō cuāhā parte cúu ó, sochi iin-ni cúu ó, tá cúu iin yiqui cúñu jā íyó cuāhā parte.

¹³Chi iin-ni cā nī nduu ó jíin yā nī nsáhá iin-ni maá Espíritu Santo tá nī jenduté ndācá ó. Súcuán cúu vísō cúu ó nchivī hebreo á nchivī griego, vísō mozo jā ní jeen nchivī á tēe sātíñú cuenta maá. De ndihi ó chi iin-ni Espíritu nī nīhīn ō.

¹⁴De iin yiqui cúñu chi nsūú iin-ni parte cúu, chi sa cuāhā parte cúu.

¹⁵De tú jēhē cāhān: Nsūú cuenta yiqui cúñu cúu nī, chi nsūú ndahá cúu nī, de nduú chi iin parte yiqui cúñu cúu ndija.

¹⁶De tú sōho cāhān: Nsūú cuenta yiqui cúñu cúu nī, chi nsūú tīnūú cúu nī, de nduú chi suni iin parte yiqui cúñu cúu ndija.

¹⁷De tú nīí yiqui cúñu ó cúu tīnūú, ¿de nāsa cunini ó túsaá? De saá-ni tú nīí yiqui cúñu ó cúu sōho, ¿de nāsa nīhīn xicō ō túsaá?

¹⁸Sochi Yāā Dios nī nchutáhān yā tá iin iin parte yiqui cúñu, nāsa nī ncuu inī yā jā coo.

¹⁹Chi tú iin-ni parte cúu ndihi, de nsūú nīí iin yiqui cúñu cúu túsaá.

²⁰De nduú chi cuāhā parte íyó, de iin-ni yiqui cúñu cúu.

²¹De ni mā cūú cāhān tīnūú jín ndahá: Nduú jini ñúhún nī ndóhó. De saá-ni xīnī, mā cūú cāhān jín jēhē: Nduú jini ñúhún nī ndóhó.

²²Chi sa ndācá parte yiqui cúñu jā jāni inī ō jā núu cā fuerza, sa suu cúu jā cánuú cā.

²³De ndācá parte jā jāni inī ō jāá nduú cáá vāha, sa suu ñuncúún cā chúhun ó sahma. De ndá parte jāá nduú cáá viī, sa vāha cā jāsī ō.

²⁴Chi ndá parte jā cáá viī, nduú cánuú jā cundasī. Chi súcuán nī nchutáhán Yāā Dios yiqui cúñu, jā ñuncúún cā jito ó jāá nduú cáá viī.

²⁵Súcuán nī nsāhá yā tácuā mā cúsíín ndācá parte yiqui cúñu, chi sa chindeé táhán vāha jín táhán.

²⁶De tú jātū iin parte yiqui cúñu, de suni ní cáhnú jātū. De tú iin parte jito ñuncúún ó, de suni ndihi-ni parte quéndōo vāha.

²⁷De ndá ndóhó chi modo yiqui cúñu Cristo cúu nú, chi iin-ni cā cúu ó jín yā. De tá iin iin nú cúu iin iin parte yā.

²⁸Túsaá de sín sín tiñu nī jēhe Yāā Dios nū ndācá nchivī cándíja jā cúu ji modo iin iin parte yā: Xihna cā ndācá apóstol jā ní jani yā jā scāca dē tūhun yā. Núcuán de jā úū, ndá tēe nācani tūhun yā, de jā únī, ndá tēe stéhēn. Núcuán de ndá nchivī jā sáhá tiñu ñáhnú jín poder yā, jín nchivī jā sáhá jā ndúvāha nchivī cúhū, jín nchivī jā chindeé táhán, jín jā ndíso tíñú, jín nchivī jā cāhān sín sín yuhú jāá nduú jícūhun inī.

²⁹¿Túsaá de á ndihi ó cúu apóstol? ¿A ndihi ó nācani tūhun? ¿A ndihi ó stéhēn? ¿A ndihi ó cuu sáhá tiñu ñáhnú?

³⁰¿A ndihi ó cuu sáhá jā nduvāha nchivī cúhū? ¿A ndihi ó cuu cāhān sín sín yuhú? ¿A ndihi ó cuu nacachī tūhun incā yuhú núcuán, á naá cúu? Nduú chi sín sín tāhvī nī nīhīn ndācá ó.

³¹Túsaá de cundihvī inī ndá nú jā cācān nū jā cuāha Yāā Dios tāhvī jā cánuú cā nū nū. De mitan de ná stéhēn ni nū ndá nú iin jā vāha cā nū ndācá cā tāhvī núcuán, suu tūhun cúndáhvī inī táhán.

Siquī tūhun jā cúndáhvī inī táhán

13 ¹Vísō tú cuu cāhān ō quéhén yuhú jā cāhān ndá nchivī á jā cāhān ndá ángel Yāā Dios, de tú nduú cúndáhvī inī ō táhán ó, de ndá tūhun jā cāhān ō cúu tá cúu iin tambor jā naxín cáxín á iin platillo jā naxín cáxín jā sáhá jā cúcúxí sōho nchivī.

²De vísō cuu nācani vāha ó tūhun yā, de cuu jícūhun inī ō ndācá tūhun yuhū yā jín ndācá tūhun ndíchí, de tú nduú cúndáhvī inī ō táhán ó, de nduú nā tiñu cuitī ō túsaá. De vísō cuu candíja téyíí ó jā jondē cuu cāhān ō jā cujiyo yucu, sochi tú nduú cúndáhvī inī ō táhán ó, de nduú nā tiñu cuitī cúu.

³De vísō ná sáji ō ndihi jā névāha ó cuu nchivī ndāhvī, de vísō ná cuáha ó tūhun jā teñuhūn nchivī yóhó jā síquī tūhun yā, de tú nduú cúndāhvī inī ō táhán ó, de nduú ná jétínú cuitī túsáa.

⁴Nchivī jā cúndāhvī inī chi íyó paciencia jín táhán, de íyó mānī inī, de nduú cúcuásún inī. De nduú sáhá vīxī, de nduú sáhá téyíí maá.

⁵Nduú sájéhe inī, nduú ndúcú jā cuu maá, nduú quítī inī, nduú chúhun inī tūhun quítī inī.

⁶Nduú cúsiī inī jín tiñu néhén jā sáhá ndá táhán, chi sa cúsiī inī jín tiñu váha.

⁷Nchivī jā cúndāhvī inī táhán chi ndihi-ni jéhdē inī jā ndoho jēhē táhán, de nduú jécuiñī jā cándija táhán, jín jā ñúhún inī jā squíncuu táhán, jín jā jéndeé inī jín táhán.

⁸Tūhun cúndāhvī inī chi mā náa cuitī. De quiji quivī jāá nduú cā nacani ji tūhun, de ni mā cáhān cā ji quéhén yuhú, de ni nduú cā jínī ñúhún tūhun ndíchí.

⁹Chi nduú jínī vāha vāha ó mitan, de tūhun yā jā nácani ó suni jacū-ni cúu.

¹⁰Sochi tá quiji quivī jā cunī ō ndihi, ñúcuán de mā cōó cā jā jínī ō jacū-ni, chi ndihi-ni cunī ō.

¹¹Tá nī ncuu ó sūchí lúlí de nī ncāhān ō tá cáhān sūchí lúlí, de nī jani inī ō de nī jícūhun inī ō modo sūchí lúlí. Sochi tá nī jahnu ó de nī sndóo ó modo sūchí lúlí.

¹²De suni súcuán, jacū-ni jícūhun inī ō mitan, modo jā ndéhé ó nūū iin espejo jāá nduú nijin vāha. Sochi cúcuéé cā de jícūhun cájī inī ō ndihi. De mitan chi jacū-ni jínī ō, sochi cúcuéé cā de cunī vāha ó nāsa Yāa cúu yā, tá cúu nūū jínī vāha yā yóhó nāsa nchivī cúu ó.

¹³Túsáa de íyó ūnī tūhun jā quéndōo cutú ní cání: jā cándija nīhin ó jā squíncuu yā jā ní nquee yuhú yā, jā cuhun inī ō ndācá jā váha jā coo, jín jā cúndāhvī inī ō táhán ó. De tūhun cúndāhvī inī chi ñáhnú ndasí cā cúu nūū ndācá cā yáhá.

Siquī jā cáhān ji quéhén yuhú

14 ¹Túsáa de cundihvī inī ndá nú jā cundāhvī inī nū táhán nú, de suni cundihvī inī nū cācān nū ndá tāhvī jā jéhe Espíritu Santo. De tāhvī jā cánuú cā cúu jā nacani nú tūhun yā.

²Chi tēe jā névāha tāhvī jā cáhān dē quéhén yuhú jāá nduú jícūhun inī dē, chi maá-ni Yāa Dios jínī jā cáhān dē, de nchivī chi nduú. Chi ni iin ji mā jícūhun inī jā cáhān dē. Chi sáhá Espíritu Santo jā cáhān dē ndá tūhun yuhū.

³Sochi tēe jā nácani tūhun yā, chi jín nchivī cáhān dē tácuā cuja ji jín tūhun yā, de sndíhvī inī dē ji, de cáhān dē tūhun ndeé inī jín ji.

⁴De tēe jā cāhān incā yuhú jāá nduú jícūhun inī, chi maá dē-ni cúu jā jíja jíin tūhun yā. Sochi tēe jā nācani tūhun yā chi sa suha sáhá dē jā nchivī cándíja, jíja ji jíin tūhun yā.

⁵Jétahān inī ni jā ndihi nú cuu cāhān nū quéhén yuhú jāá nduú jícūhun inī nū, sochi jā cánuú ndasí cā cúu jā nacani nú tūhun yā. Chi ñáhnú cā tiñu sáhá tēe jā nācani tūhun yā nsūú cā tēe jā cāhān incā yuhú jāá nduú jícūhun inī. Chi tú nduú nā tēe jā cachī tūhun nā tūhun cúu jā cāhān dē, de mā cuetíñú jā cuja nchivī cándíja.

⁶Jā ñúcuán hermano, tá cuēē ni nūū ndá nú de tú cāhān ni jíin yuhú jāá nduú jícūhun inī nū, ¿de nāsa cuetíñú ñúcuán túsaá? Sochi tú cāhān ni iin tūhun jā ní stéhēn yā, á iin jā cutūha nú tūhun ndāā, á iin jā nācani nī tūhun yā, á iin jā stéhēn ni nūū nū, suu ñúcuán cúu jā cuetíñú.

⁷Ná sáhá ó cuenta jā instrumento música, vísō nduú tēcū, de cuu cata, tá cúu flauta jíin arpa. De tú nduú jíta sín sín nota, ¿de nāsa cunī ō nā yaā jíta?

⁸De tú trompeta nduú ndáhyū cājí, de ni iin tēe mā sáhá tūha dē jā quíhīn de guerra.

⁹De saá-ni ndá ndóhó, tú nduú cāhān cājí nú tūhun jā jícūhun inī nchivī, ¿de nāsa cunī ji nāá cúu jā cāhān nū? Chi tūhun jā cāhān nū chi vāchi tāchī-ni jíso cuāhān jíin.

¹⁰De ndāā chi íyó cuāhā yuhú inī ñayiví, de ndācá yuhú chi íyó nchivī jícūhun inī.

¹¹Sochi tú nduú jícūhun inī ō yuhú jā cāhān iin tēe, de cúu ó tá cúu tēe ñuū jicá nūū tēe jā cāhān, de suni tá cúu tēe ñuū jicá cúu dē nūū maá ó.

¹²De jā ñúcuán ndá ndóhó jā cúnī ndasí nú nīhīn nū tāhvī jā jéhe Espíritu, cācān nū tāhvī jā sáhá jā cuja nchivī cándíja jíin tūhun yā.

¹³Túsaá de nchivī jā cāhān incā yuhú jāá nduú jícūhun inī ji, ná cācān táhvī ji jā cuu nacachī tūhun ji yuhú ñúcuán.

¹⁴Chi tú jícān táhvī ō jíin incā yuhú, de maá ánō ō-ni cúu jā jícān táhvī, sochi nduú ná jétíñú jíin jāá ntúnī ō.

¹⁵¿Nāsa sáhá ó túsaá? Ná cācān táhvī ō jíin ánō ō, de saá-ni jíin jāá ntúnī ō. De suni ná cáta ó yaā īi jíin ánō ō, de saá-ni jíin jāá ntúnī ō.

¹⁶Chi tú nācuetáhvī nú maá-ni tūhun jā ní nquiji nūū ánō nū, de nduú jícūhun inī nū, túsaá de tēe níni jāá nduú jícūhun inī, mā cūú nacuetáhvī dē jíin nú. Chi nduú jínī cuiti dē nā tūhun cāhān nū.

¹⁷Ndāā chi vāha nācuetáhvī maá nú, sochi incā dē nduú ná níhīn dē jā cuja ánō dē jíin tūhun yā.

¹⁸Ná cútahvī ni nūū Yāā Dios jā cuāhā cā vuelta cāhān ni jíin yuhú jāá nduú jícūhun inī ō nsūú cā ndá ndóhó.

¹⁹De vísō sūcuán de tá íyó tūtú nī jín nchivī cándíja, de jétahān cā inī nī cāhān nī ūhūn-nī tūhun jā jícūhun inī ji de stéhēn nūū ji, nsūū cā jā cāhān nī ūxī mil tūhun jín incā yuhú jāá nduú jícūhun inī ji.

²⁰Hermano, mā cānī inī ndá nú modo sūchí lúli, chí sa cuja nú jā jícūhun vāha inī nū. Sochi coo nú tá nūū cúu sūchí lúli jāá nduú jínī ji tiñu néhén.

²¹De suha yósō nūū tutū ley yā janahān: Jín tūhun jā cāhān tēe incā yuhú, jín tūhun jā cāhān tēe ñuū jícá, sāhá nī jā cunini ndá nchivī yáhá tūhun nī. Sochi nī jín ñúcuán de mā sāhá ji cuenta tūhun jā cāhān nī, cáchī maá Jētohō ō.

²²Túsaá de tú névāha ó tāhvī jā cāhān ō quéhén yuhú, ñúcuán cúu iin jā stéhēn poder Yāā Dios nūū nchivī jāá nduú cándíja, nsūū nūū nchivī cándíja. Sochi jā nācani ó tūhun yā, ñúcuán cúu jā stéhēn nūū nchivī cándíja, nsūū nūū nchivī jāá nduú cándíja.

²³Túsaá de tú ndācá nú nchivī cándíja, íyó tūtú nú de ndācá nú cāhān sín sín yuhú, de quívi ndá nchivī jāá nduú jícūhun inī jín nchivī jāá nduú cándíja, ¿de á mā cāhān ji jā ní nduu loco ndá nú?

²⁴Sochi tú ndācá nú nācani tūhun yā, de tú quívi iin tēe jāá nduú cándíja á iin tēe jāá nduú jícūhun inī, ñúcuán de cunī dē jā tēe íyó cuāchi cúu dē, de coto túnī dē maá dē jín tūhun jā nācani ndá nú.

²⁵De nūcūhun inī dē ndācá jā ní jani yuhū inī dē jín ánō dē. Ñúcuán de cuiñi jítí dē de chiñúhún dē Yāā Dios. De cāhān dē jā Yāā Dios íyó ndíja yā jín ndá nú.

Siqui jā coo ñuncúun de coo yíñúhún tá ndútútú ó

²⁶Túsaá de tá ndútútú ndá nú, hermano, de ndācá nú coo iin yaā īī cata nú, á iin tūhun jā stéhēn nū, á iin tūhun jā ní nsāhá Yāā Dios jā jícūhun inī nū, á incā yuhú jā cāhān nū, á jā nacachī tūhun nú tūhun incā yuhú. De ndācá ñúcuán sāhá ndá nú tácuā cuja nchivī cándíja jín tūhun yā.

²⁷De tú íyó tēe jā cāhān incā yuhú, de ná cāhān ūū á ūnī dē-nī, de tá iin tá iin dē ná cāhān. De suni jínī ñúhún jā nacachī tūhun iin tēe tūhun ñúcuán.

²⁸De tú nduú nā tēe íyó jā cuu nacachī tūhun tūhun ñúcuán, de ndá tēe jā cāhān incā yuhú, vāha cā mā cāhān dē nūū ndútútú ndá nú, de ná cāhān maá dē-nī jín Yāā Dios.

²⁹De saá-nī ndá tēe nācani tūhun, ná cāhān ūū á ūnī dē-nī, de sava cā nū nācani inī nū tú íyó ndāā jā cāhān ndá tēe ñúcuán.

³⁰De tú incā tēe jā ndēē nī nihīn dē iin tūhun jā ní stéhēn yā nūū dē, túsaá de tēe cāhān ná jécuiñi dē jā cāhān dē, tácuā cāhān incā tēe ñúcuán.

³¹Túsaá de tá iin tá iin nú cuu nācani ndá nú tūhun jā stéhēn yā nūū nū, tácuā cutūha ndá nú de coo ndeé inī nū.

- ³²De ndá tēe nácani tūhun, cánuú jā cuetáhví dē jā nacani incā tēe tūhun de jencuiñi jā cáhān maá dē.
- ³³Chi Yāa Dios cúni yā jā ná cóo nañíí mähñú ndá nú, nsūú jā sácā nuu de cuvaā nū. De tá cúu nū sáhá ndá grupo nchivī cándíja,
- ³⁴de saá-ni ndācá ñahan jā ndútútú jín nchivī yā, ná cóo nañíí ña. Chi nduú vāha jā cáhān ña, chi sa cuetáhví ña, tá cúu nū cáhān tutū ley yā.
- ³⁵De tú cúni ña cucáhnú inī ña iin tūhun, de jondē vehe ná catūhún ña yíi ña. Chi tūhun canoō cúu de tú cáhān iin ñahan mähñú nū ndútútú nú.
- ³⁶De sáhá ndá nú cuenta chi nsūú nū ndá máá nú ní nquée tūhun Yāa Dios, de suni nsūú vāchi ndá ndóhó-ni ní nīhīn tūhun yā.
- ³⁷Tú iin tēe jáni inī dē jā tēe nácani tūhun jín tēe névāha Espiritu cúu dē, túsaá de ná cuetūhún dē jā tiñu jā ní ndacu maá Jētohō ō cúu jā tēe nī yáhá.
- ³⁸Sochi tú nduú jétáhví dē tūhun yáhá, de suni mā cuetáhví ó dē.
- ³⁹Túsaá, ñanī mánī, cundihví inī ndá nú nacani nú tūhun yā, de mā cásī nū nū tēe jā cáhān sín sín yuhú.
- ⁴⁰Sochi ñuncúun de yíñuhún sáhá ndá nú ndācá tiñu.

Tūhun jā ní natecū Cristo

- 15** ¹Hermano, mitan de nūcūhun inī ndá nú tūhun jā scácu yā yóhó jā ní nacani nī nū nū. De tūhun ñúcuán chi ja nī jetáhví ndá nú, de suni íñi nīhīn nú jín.
- ²De suni jín tūhun ñúcuán cúu jā ní scácu yā ndá nú, de tú íñi nīhīn nú jín tūhun jā ní nacani nī nū nū, de tú nduú ní ncándíja cáhá nú.
- ³Chi tūhun cánuú cā jā ní nīhīn maá nī nī nastéhēn nī nū ndá nú: Jā ní jīhī Cristo sīquī cuāchi ó, tá cúu nū ja cáhān tutū ī jondē janahán.
- ⁴De nī jīquiyuhū yā, de nī natecū yā nū únī quivī, tá cúu nū cáhān tutū ī.
- ⁵De nī nenda yā nū Pedro. De sá de nī nenda yā nū ndihúxī cā apóstol.
- ⁶De sá de nī nenda yā nū víhī cā ūhūn ciento hermano jā íyó tutú. De sava jī tēcū cā mitan, de sava jī ja nī jīhī.
- ⁷De sá de nī nenda yā nū Jacobo, sá de nū ndihi cā apóstol.
- ⁸De jā sándihī de nī nenda yā nū maá nī. De tá cúu iin jā ní ncacu yuté, súcuán cúu jā iin sanaā-ni de nī nduu nī apóstol.
- ⁹Chi tēe núu cā nū ndá cā apóstol cúu nī, de nī nsūú tēe vāha cúu nī jā cunaní nī apóstol, chi nī nsāhá nāvāha nī nchivī cándíja nū Yāa Dios.
- ¹⁰De sīquī jā ní nsāhá Yāa Dios jā váha nduhū, jā ñúcuán cúu jā cúu nī apóstol mitan. De jā ní nsāhá yā jā váha nduhū, chi nduú cáhá ní ncúu, chi sa nī scáca cā nī tūhun yā nsūú cā ndá cā tēe apóstol. Sochi nsūú maá nī ní nsāhá, chi sa Yāa Dios nī nsāhá yā jā váha ñúcuán jín nī.

11 Túsaá de vísō nduhū á ndá cā tēe ñúcuán, de súcuán nácani ndá nī tūhun, de suu cúu jā ní ncandíja ndá nú.

Tūhun jā natecū ndīyi

12 De tú nácani ndá nī tūhun Cristo jā ní natecū yā mähñú ndīyi, ¿de nājēhē cáhān sava ndá nú jā má nátecū ndīyi?

13 Chi tú mā nátecū ndīyi, de suni mā nátecū Cristo nícu.

14 De tú nduú ní nátecū Cristo, de nácani cāhá ndá nī tūhun yā nícu, de suni cándíja cāhá ndá nú nícu.

15 Chi tú jā súcuán cúu, de cúu ndá nī tēe jāá nduú cáhān ndāā tūhun Yāā Dios, chi nī ncachī nī jā ní nastécū Yāā Dios Cristo. De tú mā nátecū ndíja ndīyi, túsaá de nduú ndāā jā ní nastécū Yāā Dios Cristo.

16 Chi tú nduú nátecū ndīyi, de juni Cristo suni nduú ní nátecū yā nícu.

17 De tú nduú ní nátecū Cristo, de cándíja cāhá ndá nú de ndíso īī cā nū cuāchi nú nícu.

18 De tú jā súcuán cúu, de suni ja nī ntānū tāhvī ndá ndīyi jā ní ncandíja Cristo.

19 Chi tú mā nátecū ndīyi, de tú maá-ni sīquī iin-ni vida yáhá cúu jā ñúhún inī ō jā sāhá Cristo jā váha yóhó, túsaá de ndáhvī ndasí cā cúu ó nsūú cā ndá cā nchivī, chi cándíja cāhá ó nícu.

20 De nduú chi íyó ndāā jā ní natecū Cristo mähñú ndīyi. De maá yā cúu jā xihna cā nī natecū nsūú cā ndācá cā ndīyi jā natecū.

21 Chi sīquī jā ní stívī iin-ni tēe Adán, de nī nquijéhé cuēhē jā jíhī nchivī. De suni súcuán sīquī jā ní nsāhá iin-ni tēe Cristo, de nátecū nchivī.

22 Chi tá cúu nūū jíhī ndihi ó sīquī jā cúu ó tatā Adán, de suni súcuán natecū ndihi ó sīquī jā yíhí ó ndahá Cristo.

23 Sochi tá iin iin nāsa ndíta táhān maá: Xihna cā Cristo nī natecū yā, de sá de quīvī ndíji yā de natecū ndá nchivī jā yíhí ndahá yā.

24 Ñúcuán de jīnu tiempo, de snāā yā poder ndācá enemigo jā cúñáhnú, jín jā ndácu tiñu, jín jā íyó poder. De ndihi jā tátúnī yā nūū, nacuāha yā nūū Tatá yā Yāā Dios.

25 Chi cánuú jā tátúnī Cristo jondē quiji quīvī jā candeē Yāā Dios poder ndācá jā jínī ūhvī nūū Cristo, de sndóho yā.

26 De jā sándihí de snāā yā cuēhē jā jíhī nchivī.

27 Chi cáhān tutū īī jā ní nsāhá Yāā Dios jā cúñáhnú Cristo sīquī ndihi jā íyó, de cuetáhvī nūū yā. De tá cáhān jā cúñáhnú yā sīquī ndihi-ni, de jínī vāha ó jā maá Yāā Dios mā quíhí yā ndahá Cristo, chi Yāā Dios cúu jā ní nchihī ndācá ñúcuán ndahá Cristo.

28 De tá nī nquīvi ndihi ñúcuán ndahá Cristo, sá de suni maá Cristo jā cúu yā Sēhe, quīvī yā ndahá maá Tatá yā, Yāā jā ní nchihī ndācá ñúcuán ndahá yā. De súcuán cúu jā tiin maá Yāā Dios ndihi-ni.

²⁹De íyó nchivī jā jéndutē ji jā jéhē ndīyi. De tú mā nátecū cuitī ndīyi, ¿de nūcu jéndutē ji jā jéhē ndīyi túsaá?

³⁰De ndá máá nī, ¿nājēhē cúu jā ndiquivī jéndeé inī ni jā íyó peligro jā cuū ni, de tú mā nátecū ndīyi?

³¹Hermano, tá cúu nū íyó ndāā jā cúsiī inī ni jā cándíja ndá nú Jētohō ō Jesucristo, suni súcuán íyó ndāā jā ndiquivī ndúcú nchivī cahnī nduhū sīqui tiñu yā.

³²De jā ní ndoho nī nī nsāhá ndá tēe xēēn ñuū Efeso jā cúu dē tá cúu quiti xēēn, ¿de nā cuá nīhīn ni sīqui ñúcuán túsaá? Chi tú mā nátecū ndīyi, de cuu cāhān ō tá cúu nū cáchi iin tūhun: Ná cúsiī inī ō de cajī ō coho ó, chi sanaā de teēn de cuū ō, cachī ō nícu.

³³Mā cuáha ndá nú tūhun jā stáhvī nchivī ndóhó. Chi cáchi iin tūhun: Tú jíca nú jíin ndá nchivī nēhén, de stívī ji ndóhó jā má cācá ndāā cā nū.

³⁴Nachuhun inī ndá nú, de sāhá nú tiñu ndāā, de mā sāhá cā nū cuāchi. Chi sava nú nduú jíin cuitī nū nāsa Yāā cúu Yāā Dios. Súcuán cāhān ni tácuā cucanoō ndá nú.

Sīqui nāsa natecū ndīyi

³⁵Sochi sanaā de cāhān iin nú: ¿Nāsa natecū ndá ndīyi? ¿Nāsa coo yiqui cúñu ji? cachī nū.

³⁶Nduú jícūhun cuitī inī nū túsaá. Chi cúu tá cúu jā chíhi ó ndācá tatā chījin ñuhun tácuā quene yūcū ji.

³⁷De tatā jā quívi chījin ñuhun, á trigo á incā tatā, chi nsūú yūcū cúu, chi maá nūnī-ni cúu.

³⁸De cuéé cā de tāhvī, chi Yāā Dios nī jēhe yā yūcū ndá tatā ñúcuán, nāsa nī jētahān inī maá yā, de tá iin iin tatā chi sīn sīn cáá yūcū nī nsāhá yā.

³⁹De suni súcuán cúu ndācá yiqui cúñu, chi nsūú inuú cáá. Chi sīn cáá nchivī, de sīn cáá quiti, de sīn cáá saā, de sīn cáá tiacá.

⁴⁰De suni súcuán cúu ndācá jā íyó andiví jíin ndācá jā íyó ñayiví. De sīn cáá viī jā íyó andiví, de sīn cáá viī jā íyó ñayiví.

⁴¹De sīn jéndutē ncandiī, de sīn ndíi yoō, de sīn xīñū ndá tiūūn. De tá iin iin tiūūn chi suni sīn sīn xīñū.

⁴²De suni súcuán coo ndá ndīyi jā natecū. Ndīyi jā chíyuhū ō chi téhyū, de tá nastécū yā chi mā cúu cā.

⁴³Jā chíyuhū ō chi ndáhvī cáá, de tá nastécū yā chi viī cuñáhnú. Jā chíyuhū ō chi nduú nā fuerza, de tá nastécū yā chi coo fuerza.

⁴⁴Jā chíyuhū ō chi iin yiqui cúñu cuenta ñayiví cúu, de tá nastécū yā chi coo iin yiqui cúñu cuenta Espíritu. Chi íyó yiqui cúñu cuenta ñayiví, de suni íyó yiqui cúñu cuenta Espíritu.

45 Chi súcuan yósō nūū tutū īī: Adán, tēe jā xihna ñúhún, nī ncuvāha dē jíín vida cuenta ñayiví, cáchī. De Cristo cúu modo incā Adán ūū, de maá yā cúu Espíritu jā jéhe vida.

46 De nsūú yiqui cúñu cuenta Espíritu cúu jā ní ncuvāha xihna cā, chi sa yiqui cúñu cuenta ñayiví, sá de nduu cuenta Espíritu.

47 De cuenta ñayiví cúu tēe jā xihna ñúhún, chi nī ncuvāha dē jíín ticāchāā ñuhun. De Adán ūū jā cúu maá Jētohō ō, chi jondē andiví nī nquiji yā.

48 De nchiví ñayiví yáhá, chi cúu ji táhán Adán jā ní ncuvāha jíín ticāchāā ñuhun. De nchiví jā quívi andiví, chi ndúu ji tá cáá maá Yāā jā ní nquiji jondē andiví.

49 Chi jā cáá ó tá nūū cáá tēe jā ní ncuvāha jíín ticāchāā ñuhun, de suni súcuan coo ó tá nūū cáá Yāā jā ní nquiji jondē andiví.

50 Tūhun yáhá cáchī tūhun nī nūū ndá nú hermano, jā yiqui cúñu ó cuenta ñayiví, mā cūú quívi nūū tátúnī Yāā Dios. Chi jā jíhī cúu, de mā cūú quívi nūū cutecū ní cání.

51 De cúnī nī jā ná jícūhun inī ndá nú tūhun yáhá jā ní nchiyuhū: Nsūú ndihi ó cuū, sochi ndihi ó chi nasāma yiqui cúñu ó.

52 Chi quívi jā tivī trompeta jā sándihí da, de iin núnúú-ni, modo iin jā nácueni ō-ni, de nasāma yā yóhó. Chi tivī trompeta, de natecū ndācá ndīyi jā má cúū cā ji. De ndācá ó jā tēcū ō quívi núcuán, chi nasāma yā yiqui cúñu ó.

53 Chi jā téhyū yáhá, cánuú nūcūhun jā má téhyū cā. De jā jíhī, cánuú nūcūhun jā má cúū cuiti cā.

54 De jā jíhī jíín jā téhyū yáhá, chi quiji quívi jā nūcūhun jā má cúū cā mā téhyū cā. Núcuán de quee ndāā tūhun jā yósō nūū tutū īī: Jíín poder yā nī snāā yā cuēhē jā jíhī nchiví.

55 Túsaá de cuēhē jā cuū ō, ¿nāsa cā cuu sáhá xēēn jíín ó? Chi natecū ō. ¿De nāsa cā cundee jíín ó? Chi snāā yā. Cáchī tutū.

56 Chi maá cuāchi cúu jā sáhá jā cundee cuēhē jā jíhī nchiví. De ley yā janahán sáhá jā nénda cuāchi sīquī ō.

57 De ná cútahvī ō nūū Yāā Dios, chi jíín maá Jētohō ō Jesucristo sáhá yā jā cundee ó sīquī cuāchi jíín sīquī cuēhē jā cuū ō.

58 Jā núcuán ñanī mánī, cuiñi nīhin ndá nú de mā cācá yátá nú. De níní satíñú vāha ndá nú jíín tiñu maá Jētohō ō. Chi ja jínī nū jāá nduú sátíñú cāhá nú jíín maá Jētohō ō.

Sīquī jā caquīn ji xūhún cuu ndá hermano

16 ¹De mitan de cāhān nī sīquī xūhún jā caquīn ndá nú jā cuu ndá hermano cándíja jā ndóho ndáhví. Suni sáhá ndá máá nú tá cúu nūū ní ndacu nī nūū ndá grupo nchiví cándíja jā íyó Galacia.

²Ndācá domingo de tá iin iin nú chuvāha síin nú jacū xūhún, tú nāsa nī nīhīn ndá nú, tácuā tá cuēē nī nūū nū de ja íyó tūha.

³De tá cuēē nī, de cuāha nī carta nūū ndá tēē jā nacāji ndá nú, de tají nī dē quīhīn dē nūū ndá hermano jā íyó Jerusalén, quisiáha dē xūhún jā ní jaquīn ndá nú.

⁴De tú íyó vāha jā quīhīn nī, de suni quīhīn nī jín ndá dē.

Jā cáhān Pablo jā quíndēhé dē ndá nchivī cándíja

⁵De jā cuēē nī nūū ndá nú, de cánuú jā xihna cā región Macedonia quenda nī coo nī ñúcuán, sá de cuēē nī ñuū ndá nú Corinto.

⁶De sanaā de coo nī jín ndá nú jacū tiempo, á sanaā de coo ó níí tiempo vījin. Ñúcuán de cuu chindeé ndá nú nduhū, ní-ni cúu nūū quīhīn cā nī.

⁷Chi nduú cúnī nī cuēē nī nūū nū jā yāha ñamā nī quīhīn nī, chi ñúhún inī nī jā coo nī jín ndá nú jacū tiempo, de tú cuāha maá Jētoho ō tūhun.

⁸De coo nī ñuū Efeso yáhá jondē yāha quivī Pentecostés.

⁹Chi íyó cuāhā nchivī jā scándíja nī, chi vāha jíca tiñu Jētoho ō. De suni íyó cuāhā nchivī jā íyó contra.

¹⁰De tú cuēē Timoteo, de sáhá ndá nú jā coo siī inī dē mähñú nú, de nī iin mā cānī inī dē sīquī. Chi suni tiñu maá Jētoho ō sáhá dē, tá cúu nūū sáhá nī.

¹¹Túsaá de nī iin ndá nú mā sájéhe inī nūū dē. Chi sa chindeé nú dē jā quīhīn cā dē, de coo ndeé coo siī inī dē, tácuā ndiji dē jā nacunī táhán nī jín dē. Chi ndétu ndá nī dē jín sava cā hermano.

¹²De hermano Apolos, chi nī ncāhān ndāhvī nī jín dē jā ná cuēē dē nūū nū jín sava cā hermano, cuēndēhé dē ndá nú. De nī jani inī dē jā má cūú cuēē dē mitan. Sochi tá nune dē de cuēē dē.

Saludo jā sándihí

¹³Ndito coo inī ndá nú, de cuiñi nīhin nú jín tūhun jā cándíja nú. De téyí coo inī nū, de coo fuerza inī nū.

¹⁴De ndācá jā sáhá nú, de sáhá nú jín tūhun jā cúndāhvī inī táhán.

¹⁵Hermano, jínī ndá nú jā xihna cā nchivī vehe Estéfanos nī ncandíja ichi Acaya. De nī jēhe ji maá ji nūū tiñu jā chindeé ji ndá hermano cándíja.

¹⁶De cúnī nī jā suni ndá máá nú cuetāhvī vāha nú nchivī jā sáhá súcuán, jín ndá cā nchivī jā chindeé táhán de sátiñú sīquī tiñu yā.

¹⁷Cúsii inī nī jā ní nquenda Estéfanos jín Fortunato jín Acaico, chi ndá tēē yáhá nī nchindeé dē nduhū lugar ndá máá nú jāá nduú ní íyo nú jín nī.

¹⁸Chi nī ndundeé inī nī nī nsáhá ndá dē, de saá-ni nī nsáhá dē ndá máá nú. De cánuú jā cuetúhún nú ndá tēē jā sáhá súcuán.

¹⁹Sāhá ndeé inī ndá nú, cáchī ndá grupo nchivī cándíja jā íyó Asia. Aquila jíín Priscila jíín nchivī cándíja jā ndútútú vehe dē, cáhān ndá ji jā sāhá ndeé ndasí inī ndá nú jíín tūhun maá Jētohō ō.

²⁰De ndācá hermano cáchī ji jā sāhá ndeé inī nū. De tá cáhān jítáhán ndá nú, de yíñúhún techuhú nú ndahá ji.

²¹Maá nī jā cúu Pablo, jíín ndahá maá nī téé nī tūhun yáhá jā sāhá ndeé inī ndá nú.

²²De tú ní iin nduú íyó mānī jíín Jētohō ō Jesucristo, de ná tánū tāhvī ji túsaá. De ná cáhān ō: Jētohō sá, cúnī sá jā ñamā nenda ní.

²³De ñúhún inī nī jā maá Jētohō ō Jesucristo, ná sáhá cā yā jā váha ndá ndóhó.

²⁴De mānī nī jíín ndá nú jā cándíja nú Cristo Jesús. Súcuán ná cóo. Amén.